

আট-আনা-সংস্করণ-গ্রন্থমালায় ষড়বিংশ গ্রন্থ

সীমন্তিনী

শ্রীদেবেন্দ্রনাথ বসু

জ্যৈষ্ঠ, ১৩২৫

প্রকাশক—শ্রীহরিদাস চট্টোপাধ্যায়,
গুরুদাস চট্টোপাধ্যায় এণ্ড সন্স,
২০১, কর্ণওয়ালিস্ স্ট্রীট, কলিকাতা।

প্রিণ্টার—শ্রীরাধাকাম্য দাস,
মিউচুয়াল প্রেস,
২ গোয়াবাগান্ স্ট্রীট, কলিকাতা।

সোদর-প্রতিম শৈশব-সুহৃৎ
কাশীমবাজারাধিপতি,
অনারেবল্ মহারাজা
শ্রীযুক্ত সার মণীন্দ্রচন্দ্র নন্দী,
কে, সি, আই, ই.

ভাই মণি,

শীতাতপ বসন্ত বর্ষায় যে সুদীর্ঘ প্রবাস-পথ
এতদিন একসঙ্গে অতিক্রম করিয়াছি, তাহা
অবসানপ্রায়। অদূরে বৈতরণীর খেয়াঘাট,
এখন পরম্পরে বিদায়-গ্রহণের দিন সন্নিহিত।
তাই, এই আসন্ন সূক্ষ্মায় আমাদের সুদীর্ঘ-
প্রবাস-পর্যটনের সুখস্মৃতির উদ্দেশে এই ক্ষুদ্র
পুস্তক উৎসর্গ করিলাম।


কলিকাতা

১লা জ্যৈষ্ঠ

১৩২৫

শ্রীতি-গুণ-যুগ্ম

দেবেন



সীমন্তিনী

নব-বিবাহিতার কাহিনী

‘বি—বা—হ ! বিবাহের নাম ত তোমা
দিগের মুখে শুনিয়া থাকি, কিন্তু কাহাকে বলে,
সবিশেষ জানি না। কি করিতে হইবে ?’—

কথাটা ঘোড়নী কপালকুণ্ডলা ভবানী-
নন্দিরের অধিকারীকে জিজ্ঞাসা করেছিল।
অধিকারী এ প্রশ্নের ছাই উত্তরই বা দিবে
কি, আর সাধারণ পুরুষজাতিই বা বিবাহের
অর্থ বুঝবে কি ? স্ত্রী-বিয়োগ হ’লে টোপের
মাথায় দিঘে যারা আবার বিবাহ করিতে যায়
—বিবাহ কি, তা’রী কি জানবে ? শ্রীরাম-
চন্দ্র যে-সীতাকে ত্যাগ করেছিলেন, সেই

সৌমস্বিনী

সীতা প্রার্থনা করেছিলেন—অন্ন-অন্ন যেন
ব্রাহ্মচন্দ্রকে স্বামিরূপে পাই। বুঝ, আমাদের
পক্ষে বিবাহ কি, স্বামী কি !

আগে আমিও বুঝতুম না। আমার
দুটি পুতুল ছিল, একটার পা ভাঙা, একটার
মাথা কাটা। বাল্যকালে তাদের যখন বিবাহ
দিতুম, তখন মনে করতুম, সত্যকার বিবাহও
এমনি একটা খেলা, স্বামীর সঙ্গে সম্পর্ক
পাতিয়ে খেলতে হয়। কিন্তু য়ে মুহূর্ত্তে আমার
শুভদৃষ্টির সামনে একটি তরুণ, সুকুমার
মনমথ-মূর্ত্তির প্রকাশ হ'ল, সেই শুভক্ষণেই
বুঝলুম, আমার নারীজন্ম, জীবন, যৌবন,
শিবপূজা, সাধনা, সব সার্থক। এত দিন তুমি
কোথায় ছিলে, হে রাজাধিরাজ ! আমার
হৃদয়-সিংহাসন যে, তোমারই জন্ত পেতে ব'সে
আছি ! পুরুষের শুভদৃষ্টিপাত না হ'লে নারীর

নব-বিবাহিতার কাহিনী

হৃদয়-বিকাশ হয় না। নারীর নারীত্বে বরণ
হয় বিবাহে।

কে বলে রূপ নইলে মন ভুলে না? যদি
তোমার কাল-কুস্মিত পতিকে কন্দর্প হ'তেও
সুন্দর না-দেখে থাক, জেনো, তোমার শুভ-
দৃষ্টি হয় নাই। আমার বিবাহ-রাত্রিতে যিনি
বরবেশে এসে আমার হৃদয়াকাশে উদ্ভিত
হ'লেন, লোকে তাঁকে বলেছিল—কাল!
শুনে, আমারও মন একটু ক্ষুণ্ণ হয়েছিল।
কিন্তু শুভদৃষ্টির সময় দেখলুম,—কাল নয়,
কাল নয়, সে পরম সুন্দর! সে সৌন্দর্য
বুঝাবার মত ভাষা আমার নাই। যার জন্ম
জীবন, যৌবন, সংসার, সব সুন্দর—যার
জন্ম আমি সুন্দর, সে কত সুন্দর, কেমন ক'রে
বুঝার? যার সোহাগ-আদর, উপেক্ষা-অনা-
দর, সব সুন্দর—সে কত সুন্দর, কেমন ক'রে

সীমন্তিনী

বুঝাব ? কা'র সঙ্গে, কিসের সঙ্গে তা'র
তুলনা দিব ? তেমন প্রেমময় চক্ষু, তেমন
মনোমোহন কটাক্ষ আর কা'র আছে ?
আমার কথায় কারুর যদি অবিশ্বাস হয়, আমার
চোখ দিয়ে দেখ । সে কাল নয়, পরম সুন্দর !
আমার সাতরাজার-ধন, সাগর-ছেঁচা মাণিক !
বুঝলুম, বিধাতা কাঙালিনীকে রত্ন দিয়েছেন ;
এখন এত সুখ আমার সহীলে হয়—এ যে
দুঃখের কপাল !

অতি অল্প বয়সে আমি ~~সুখী~~ ^{সুখী} হই ।
আমার বেশ মনে পড়ে, সেদিন দেখেছিলুম,
মায়ের চক্ষু যেন জ্বাফুলের মত লাল ; চুল-
গুলি আলুথালু, মুখখানি প্রভাতের চাঁদের
মত স্নান । তিনি আমার হাত ধ'রে বাবার
কাছে নিয়ে গেলেন । বাবা আমায় একবার
দেখে চোখ বুজলেন । কি সর্বনাশ হ'ল,

নব-বিবাহিতার কাহিনী

তখন আমার বোঝার বয়স নয় ; কিন্তু
শুনলুম, যা একটু উচ্চৈঃস্বরে তিনবার ব'লে
উঠলেন—‘সৎ—সৎ—সৎ !’

সে সময় আমাদের বাড়ীতে যারা ছিল,
তা'রা অমনি ছুটে এসে জোড়হাত ক'রে
দরজার কাছে দাঁড়াল। তারপর চুপি-চুপি
সকলে কি বলাবলি করলে। খানিকপরে
কেউ লাল চেলী আনলে, কেউ সিঁদুর, কেউ
ফুলের মালা। পাড়ার বধুরা এসে অঞ্চলে
চক্ষু মুছতে-মুছতে মাকে সাজাতে লাগল।
অল্পক্ষণ পূর্বে যে মায়ের মুখ দেখেছিলুম ছিন্ন-
ভিন্ন, শ্রীহীন পদ্মের মত, এখন দেখি যেন
জল্জল্ ক'রে জল্ছে। আমি তাঁর
কাছে যেতে চাইলুম, কিন্তু বি আমায় ছেড়ে
দিলে না।

প্রতিবেশী-বধুরা কেউ সযত্নে মায়ের শুভ্র

সীমস্তিনী

ললাটে শ্বেত-চন্দন মাখিয়ে রক্ত-চন্দনের টিপ
পরিয়ে দিলে; কেউ ফুলের মালা, কেউ
আলতা পরালে; সীমস্তভ'রে সিঁদূর
দিলে। মায়ের মুখখানি যেন নব-বধূর মত
ঢল-ঢল করতে লাগল। তারপর বাবাকে
একখানি খাটের উপর শুইয়ে দশ-পনের জন
লোকে খই-কড়ি ছড়াতে-ছড়াতে, সর্কীর্জন
করতে-করতে ব'য়ে নিয়ে চলল। মা লাল
চেলী প'রে, পূর্ণঘট ও আশ্র-শাখা হাতে ক'রে
পিছনে-পিছনে যেতে লাগলেন। বাবা চল-
লেন, মা চললেন, আমায় কেউ ডাকলেন না।
মনের ভিতর কেমন করতে লাগল। ঝিয়ের
কোল থেকে নেমে প'ড়ে ছুটে গিয়ে মায়ের
আঁচল ধরলুম। তিনি ফিরেও চাইলেন না,
আমাকে আন্তে-আন্তে ঠেলে দিলেন। ঝি
তাড়াতাড়ি এসে আমায় কোলে তুলে নিলে।

নব-বিবাহিতার কাহিনী

পুরুষমানুষেরা হরিষ্মনি করছে; স্ত্রী-
লোকেরা হলুধ্মনি দিচ্ছে; কেউ মায়ের
পথে অঞ্জলি-অঞ্জলি ফুল ছড়াচ্ছে। একটি
স্ত্রীলোক কোথাথেকে ছুটে এসে মায়ের পায়ে
কাছে একটি কঙ্কালসার শিশুকে ফেলে দিয়ে
বললে, 'একবার প্রসন্ন-দৃষ্টিতে চাও মা।'
একজন বললে, 'মা, আমি জন্মান্ত, একবার
আমার চোখে তোমার পদ্ম-হস্ত বুলিয়ে দাও,
আমি দেখি—তোমার পা দু'খানি দেখি!'
কেউ তাঁর সামনে লুটিয়ে প'ড়ে মায়ের ধূল
নিয়ে সর্বাঙ্গে মাখতে লাগল, কেউ তাঁর পায়ে
ফুল দিয়ে, কুড়িয়ে নিয়ে, মাথায় ঠেকিয়ে
আঁচলে বাঁধলে। আজ আমার মা যেন অগভীর
মা, আমার কেউ নয়, আমিও তাঁর কেউ নই।
নিতান্ত পরের মত এই অসুত দৃশ্য দেখতে-
দেখতে ঝিয়ের সঙ্গে চললুম—নদীতীরে।

সীমন্তিনী

সেখানে কোথা হ'তে এক সাহেব ঘোড়া ছুটিয়ে এসে উপস্থিত। সকলে চুপি-চুপি বলাবলি করতে লাগল—‘পাদ্রী সায়েব, পাদ্রী সায়েব। একটা গোল বাধাবে দেখছি।’

সাহেব ভিড় ঠেলে মায়ের সামনে গিয়ে টুপি খুলে সেলাম দিলেন। তারপর যাকে বোঝাতে লাগলেন—আত্মহত্যা পাপ, এমনি কত কথা।

মা বললেন, ‘সাহেব, আমি ত মরেই গিছি।’ তারপর বাবার মৃতদেহ দেখিয়ে বললেন, ‘এঁর সঙ্গে আমার জীবন চ’লে গিয়েছে। প’ড়ে আছে কেবল হাড়-মাসের খাঁচা। তুমি এসে আমার নাড়ী দেখ, যদি জীবনের কোন লক্ষণ পাও, আমি আর আগুনে পুড়ব না।’ পাদ্রী সাহেব মায়ের

নব-বিবাহিতার কাহিনী

নাড়ী পরীক্ষা ক'রে বিস্মিত হ'য়ে দাঁড়িয়ে
রইলেন।

সেদিকে কোন উপায় নাই দেখে
সাহেব অবশেষে সঙ্কান নিলেন, মায়ের কে
আছে। শুন্লেন, একটি ছোট মেয়ে।
কই? ঐ যে! সাহেব অমনি ঝয়ের
কোল থেকে আমায় নিয়ে গিয়ে মাকে
বল্লেন, 'মায়ি, তুমি চলিলে, ইহাকে কে
দেখিবে?'

মা অলঙ্কৃত একটি আঙুল তুলে
উর্দ্ধদেশ দেখিয়ে দিলেন। তখন পাদ্রী
বল্লেন, 'মায়ি, ইহাকে তবে আমাকে
দাও। আমি আপন কন্টার সমান পালন
করিব। ইহাকে লেখাপড়া শিখাইব।'

আমাকে খীষ্টান করবে, এই ভয়ে মায়ের
মুখের উপর একটা আতঙ্কের ছায়া পড়ল।

সীমন্তিনী

তিনি চারদিক চেয়ে জ্যোঠাইমাকে দেখতে পেয়ে বললেন, 'দিদি—!'

জ্যোঠামশায় অমনি এগিয়ে এসে বললেন, 'ছোট-বোমা, খুকীকে আমার কাছে দিয়ে যাও।' জ্যোঠাইমা আমায় কোলে তুলে নিলেন, মায়ের মুখ আবার প্রসন্ন হ'ল।

তারপর পাদরী সাহেব সেখানকার সব সমাগত লোকদের বললেন, 'একটি জীবন্ত জ্বীলোক আগুনে পড়িয়া ছটফট করিতে-করিতে মরিবে, আর তোমরা সেই নিষ্ঠুর দৃশ্য উদাসীন চক্ষে দাঁড়াইয়া দেখিবে? তোমরা সব মানুষ, না পশু! জানো, আইনে তোমরা দণ্ডনীয়।'।

ঈশানে একটি ঘৃত-পূর্ণ প্রদীপ জ্বলছিল, যা তার শিখায় আপনার কনিষ্ঠাঙ্গুলীটি ধরলেন। আঙুল জ্বলতে লাগল। সকলের

নব-বিবাহিতার কাহিনী

মুখ ভয়ে বিবর্ণ, কেবল ঝাঁর আঙুল পুড়ছে, তাঁর মুখ প্রসন্ন, হাস্তময় ! সাহেবকে সঙ্কো-
ধন ক'রে বললেন, 'সাহেব, এক জন্ম নয়,
তিন জন্ম আমি এঁর সঙ্গে পুড়ছি ।'

সাহেব তখন গুম্ হয়ে ঘোড়ায় চড়বার
জন্মে চললেন । কিন্তু পাছে তিনি ফাঁড়ীতে
গিয়ে পুলিশের সাহায্য গ্রহণ করেন, এই ভয়ে
গ্রামবাসীরা তাঁর ঘোড়াটি সরিয়েছিল । ফাঁড়ী
অনেক দূর, পদব্রজে সেখানে পৌঁছুতে এখান-
কার কাজ শেষ হ'য়ে যাবে ।

সাহেব হেঁটেই চ'লে গেলেন । কিন্তু
তাঁর ভাব-ভঙ্গী দেখে মায়ের ভয় হয়েছিল ।
তিনি উচ্চকণ্ঠে বললেন, 'এ হিঁদুর দেশে কি
এমন কেউ নাই যে, সতীর ধর্মপালনে
সহায়তা করে ?'

তখন আমাদের দেশের অমীদার যাকে

সীমন্তিনী

সাপ্তাহ্যে প্রণাম ক'রে বললেন, 'কি ছকুম কর, মা ?'

মা বললেন, 'বাবা, আমার কাজে যারা এসেছেন, তাঁরা যেন না কোন বিপদে পড়েন এই আমার ভিক্ষা।'

জমীদার তখন সকলকে লক্ষ্য ক'রে, বললেন, 'আমাকে চেন কি ? ঐ খুঁটান ছাড়া পুলিশ যদি কারুর কাছে এ ঘটনার কোন সংবাদ পায়, আমি সাতখানা গ্রাম পোড়াব। সকলে হরিধ্বনি কর।'

যেন কে জ্বাল ভেঙে দিলে ! গগন-ভেদী হরিধ্বনি উঠল !—'জয় সতীমায়ের জয় !' মা বাবার পাশে চিতা-শয্যা শয়ন করলেন। সতীদেহ-স্পর্শের উল্লাসে পাষক যেন প্রফুল্ল হ'য়ে উঠল। জ্যেঠাইমা আমায় কোলে নিয়ে ছুটে পালালেন।

নব-বিবাহিতার কাহিনী

সেই অবধি আমি জ্যেষ্ঠামশায়ের বাড়ীতে। পিতার সঞ্চিত অর্থ কিছু ছিল কিনা, জানি না। তবে একখানি বাড়ী ছিল আর মায়ের অনেকগুলি গহনা ছিল। সেগুলি সব একে-একে জ্যেষ্ঠামশাই বিক্রয় ক'রে ফেললেন। গয়নাগুলি বেচবার সময় জ্যেষ্ঠাইমা বলেছিলেন, 'ছোট বউ ওগুলি খুকীর বে'র জন্তে দিয়ে গেছলেন।' জ্যেষ্ঠামশায় তা'র উত্তর দিলেন, 'রোজগার ত কাউকে করুতে হয় না, কেবল ব'সে-ব'সে কাঁড়ি-কাঁড়ি গেলো। ঐ হাতী-মেয়ের খোরাক আসবে কোথেকে? ঐ টাকা ওরই নামে চুমা রইল। সুদ আসবে, থাকবে। আমি কি গাঁটের কড়ি ধরচ ক'রে ভাইবির পিণ্ডি যোগাব না কি?'

সত্যই আমরা সেই সুদ খেয়ে থাকতে

সীমন্তিনী

হ'ত। দু'বেলার এক বেলাও আমার ভাল ক'রে পেট ভরত না। এক-একদিন দুবেলাও জুটত না। বোধ করি, সেদিন সূদ আসত না। তবে যেদিন সূদ বন্ধ হ'ত, সেদিন যে কেবল আমারই সূদ বন্ধ হ'ত, এমন নয়, বাড়ীসুদ্ধ সকলের,—অর্থাৎ, এই হতভাগিনীর, জ্যোঠাইয়ার, তাঁর পুত্রের আর জ্যোঠামশায়ের নিজেরও। কেবল ঝি-চাকরদের সূদ বন্ধ হ'তে কখন দেখিনি, কেননা, জ্যোঠামশায়ের সংসারে সে-সব বালাই কিছু ছিল না। সুতরাং, তাদের ম'নব-বাড়ী তা'রা পেট ভ'রে খেয়ে বাঁচত।

জ্যোঠামশায়ের আকার ও আহার দু-ই একপ্রকার ছিল—চামচিকার মত! বাস্তবিক এত অল্প আহারে যে কি ক'রে মানুষ বাঁচতে পারে, তা আমি এখনও বুঝতে পারিনি।

নব-বিবাহিতার কাহিনী

বোধ করি, জ্যেষ্ঠামশায় সে সম্বন্ধে যে তথ্য
আবিষ্কার করেছিলেন, সেটা সত্য। তিনি
বলতেন, 'খাওয়াটা জীবনের ঘেমন উদ্দেশ্য
নয়, তেমনি আবশ্যকও নয়। যোগীরা বাঁচে
কেমন ক'রে? ওটা অভ্যাসমাত্র। বেশী
খাওয়াটা ত একেবারেই বদ্-অভ্যাস।
শরীরের নাম মহাশয়, যা সওয়াবে'—ইত্যাদি।
পাছে কেউ বদ্-অভ্যাস ক'রে ফেলে, তাই
জ্যেষ্ঠামশায় ভাঁড়ারের চাবি তাঁর নিজের
হাতে রাখতেন। নিজে চাল-ডাল সব বের
ক'রে দিতেন। আমি আসাতে জ্যেষ্ঠাইমা
চাল ডাল বেশী ক'রে চাইলেন। জ্যেষ্ঠামশায়
তাঁর পরিবর্তে উক্ত উপদেশগুলি দিলেন।
সংসারে লোক বাড়ল, কিন্তু চাল-ডালের
খরচ সমান রইল।

জ্যেষ্ঠামশায়ের পুত্রটি আমার চেয়ে অনেক

সীমন্তিনী

বড়। তা'র তখন খাবার বয়স। কিন্তু দেখতুম, সে যত না ভাত খেত, মার খেত তা'র চেয়ে অনেক বেশী। আর সে একেবারে চোরের মার। সেও সত্য-সত্যই চোর ছিল। কিন্তু আমি তা'র মার দেখে ডাক-ছেড়ে কাঁদতুম শেষে সে-ই এসে আমায় ভোলাত।

সে যে কি সোনার চক্রে আমায় দেখেছিল, বলতে পারি না। তা'র সেই আধ-পেটা ভাত সে দু'গ্রাসমাত্র খেয়ে আমাকে খাওয়াত, তাইতে আমি বেঁচেছিলুম। শুনেছি, সে পেটভ'রে খেতে পেত না ব'লে চোর হ'য়েছিল। আমি তা'কে দাদা ব'লে ডাকলে সে স্বর্গ হাতে পেত! ক্রমে সে বেত খেলে, জেল খাটলে, বাড়ী থেকে তাড়িত হ'ল। কিন্তু আমার প্রতি তা'র অকৃত্রিম স্নেহ একতিল কমল না।

নব-বিবাহিতার কাহিনী

সে নিত্য লুকিয়ে এসে আশায় দেখে যেত। ধরতে পারলে জ্যেঠামশায় তা'কে মারতেন। জ্যেঠাইমা যদি কখন তা'কে চুপি-চুপি ডেকে খাওয়াতেন, জ্যেঠামশায় তা টের পেলে আর তাঁর রক্ষা থাকত না। প্রথম, গালের স্রোত দু'কূল ছাপিয়ে চলত, তারপর, শঙ্করকুল পিতৃকুল পরিত্যক্ত হ'লে, জ্যেঠামশায় জ্যেঠাইমাকে প্রহার আরম্ভ করতেন। সে মার যদি জ্যেঠাইমাকে সব খেতে হ'ত, তাহ'লে আর তিনি বাঁচতেন না। আমার চোর ভাইটি তার মাকে সামলে সমস্ত মার নিজের শরীরে নিত। তখন তা'র উদয়মুখ যৌবন, গায়ে হাতীর বল, জ্যেঠামশায়ের উপর যদি সে অত্যাচার করত, বোধ করি, হাতীর কাছে চাম্-চিকার যে দুর্দশা হয়, জ্যেঠামশায়েরও

সৌমস্বিনী

তাই হ'ত; কিন্তু বাপের গায়ে সে হাত
তুলত না।

অবশেষে সব অত্যাচার নিবারণ এবং
সকল দিক বজায় রাখবার জন্য দাদা এক
অদ্ভুত কৌশল উদ্ভাবন করলে। বাড়ীতে
আর সুধু হাতে আসত না; লাউটা, কুমড়টা,
একটা-না-একটা কিছু আনত। কোথা
থেকে আনত, জ্যেষ্ঠামশায় তার কোন খোঁজ
করতেন না। বোধ করি, ভাবতেন, পচা
পুকুরের পাক না শুটকানই ভাল। যা'ই হ'ক,
যেদিন কিছু না আনত, সেই দিনই বিপদ।

সে মুখ বুজে সব অত্যাচার সহ্য করত,
কেবল এক লহমা আমাকে দেখবার জন্য।
এ-কে কি না-ভালবেসে থাকা যায়? বাপ,
মা, ভাই, বোন, কেউ ছিল না, আমার
ক্ষুদ্র হৃদয়ে যে স্নেহের বান ডাকত, সে কেবল

নব-বিবাহিতার কাহিনী

এই চোর ভাইটির জন্ত। মেঘ কি কাটা-
বনের উপর বর্ষণ করে না ?

জ্যোঠামশায়ের অনিচ্ছাসত্ত্বেও আমার
বয়স বাড়তে লাগল। চৌক পেঁরিয়ে পনেরফ
পড়লুম। বর আর ষোটে না। যত সঙ্ক
আসে, জ্যোঠামশায় একটা-না-একটা উপায়
ক'রে ভেঙে দেন। তাঁর দারুণ ভয়, আমার
বিবাহ হ'লে খণ্ডরবাড়ীর তাড়নায় আমার
বাড়ী ও গহনা বেচার টাকাগুলি সব
ওগ'রাতে হবে।• তাঁর উপর তাঁর
আন্তরিক ইচ্ছা, আমি তাঁদের হাত-ছাড়া
না-হয়ে যাই। সে-যে আমার উপর মম-
তায়, তা নয়। তেমন মহাপাপ তিনি কখন
করেন নি। বিনাবেত্তনে একাধারে এমন
কি রাধুনী আর কোথায় পাবেন? আমি
রাধি, বাসন মাজি, সংসারের অন্য কাজ-কর্ম

সীমন্তিনী

করি। জ্যোঠাইমা সূতাকাটা প্রভৃতি এমন সব কাজ করেন, যা'তে দু'শয়সা লাভ হয়। একটু অবসর ক'রে যে, তিনি আমার সাহায্য করবেন, কিছুতেই তা পারতেন না। সে সাধ্য তাঁর ছিল না। জ্যোঠামশায়ের দৃষ্টি ছিল অতি তীক্ষ্ণ।

যে সময়ক আস্ত, জ্যোঠামশায় একটা অসম্ভব দর হেঁকে বসতেন। তাঁর প্রতিজ্ঞা, যদি একান্তই আমায় ছাড়তে হয়, আমার ওজনে টাকা পেলে তবে ছাড়বেন। বোধ করি, স্বয়ং যম এসেও তাঁকে প্রতিজ্ঞা হ'তে টলাতে পারতেন না। কিন্তু এত ক'রেও তিনি আমায় রাখতে পারলেন না। আমার বিবাহ হ'ল! ভবিতব্য!

আমাদের গ্রামের বহুদূরে একঘর বড়-মাস্তুল ছিলেন। তাঁদের একমাত্র বংশধর এত

নব-বিবাহিতার কাহিনী

দিন কল্কেতায় থেকে লেখাপড়া শিখছিলেন।
এ দেশে ইংরাজী-শিক্ষার তখন ভারি ধুম !
আমাদের গায়ের জগা ময়রার ছেলে, দোকানে
সন্দেশের ওপর মাছি বসলেই তা'র বাপকে
চৈচিয়ে বলত—‘বাবা, এ ফ্লাই—এক মাছি’ !
যাক সে কথা ।

সেই বড়-লোকের ছেলে পড়া-শুনা শেষ
ক'রে দেশে এলে, কবে, কখন, কোথায় যে
আমি তাঁর নিশীথ-নিজার ব্যাঘাত জন্মে-
ছিলুম, তা তিনিই জানেন । বাবুটি, বোধ
করি, একটু রোমাটিক ! কথাটা আমার
তাঁরই কাছে শেখা । আবার ইংরাজী-
শিক্ষিত ব'লে বয়স্ক-কন্তা বিবাহ ক'রে
সমাজকে উন্নতির আদর্শ দেবার জন্য তাঁর
বিশেষ উৎসাহ । তা'র উপর তিনি যখন
শুনলেন, আমার মা 'সতী' হয়েছিলেন, তখন

সীমন্তিনী

আমাকে বিবাহ করবার জন্য তাঁ'তে উন্মাদের লক্ষণ সকল প্রকাশ হ'তে লাগল। তাঁরও বাপ-মা ছিলেন না, সংসারের কর্তী একমাত্র পিসীমা। বাবুটি তাঁর কাছে বায়না নিয়ে, তাঁকে ভয় দেখিয়ে, ছোঁঠামশায়ের খাঁই মিটিয়ে, আমাকে কিনে নিয়ে গেলেন। অধর্ম-কথা কইব না, ছোঁঠামশায় আমাকে দু'গাছি রুলী যৌতুক দিয়েছিলেন!

বিবাহ হ'য়ে গেল। যে-রত্ন লাভ করেছি, তা'র আনন্দে আমার হৃদয় পরিপূর্ণ। তবু এতদিনের আশ্রয়, স্নেহময়ী ছোঁঠাই-মাকে আর সেই চোর ভাইটিকে ছেড়ে যেতে আমার বড় মন কেমন করতে লাগল। ছোঁঠাইমা আমার হাত ধ'রে গোপনে ডেকে নিয়ে গিয়ে বললেন, 'ছি, মা, কেঁদ না! আজ তোমার এই যন্ত্রণার জেল থেকে মুক্তি হ'ল।

নব-বিবাহিতার কাহিনী

সরণ বই আমার আর নিষ্কৃতি নেই। মা, তুমি জানো, আমি বড় দুঃখিনী। মেয়ে-মানুষ পতি-পুত্র নিয়ে সুখী, আমার সেই দু'টিই দুঃখের মূল। ছোট বউ তাঁর কোল থেকে তোমাকে আমার কোলে দিয়ে গিয়েছিলেন, কিন্তু আমি মনের মতন যত্ন ক'রে তোমায় মানুষ করতে পারি নি। কেন পারি নি, তুমি এখন বড় হয়েছ, জানো। তোমাকে জোর ক'রে কোন কথা বলবার আমার দাবী নেই। তবু একটা কথা বলি—রাখবে কি, মা?”

আমি উদ্বেলিত হৃদয়ে জ্যেঠাইমার বুকে মুখ রেখে কাঁদতে-কাঁদতে বললুম, ‘মা, আমি যে তোমাকেই মা ব’লে জানি।’

জ্যেঠাইমা আমাকে আরও জোর ক'রে বুকে চেপে ধ'রে বললেন, ‘আমি, মা, তোমায়

সৌমস্তুিনী

ভাল রকম জানি ব'লেই কথাটা বলতে সাহস
করছি। 'মা, স্বীলোকের স্বামীর চেয়ে কেউ
নেই। স্বামী দেবতা। দেবতা সদয় হোন,
নির্দয় হোন, সে তাঁর ইচ্ছা। আমার কাজ,
তাঁকে পূজা করা। আমি, মা, এই কথাটি
মনে ক'রে এ-বাড়ীতে দিন কাটাই। যে-
পায়ের মাখি খাই, নিত্য সেই পা ধুইয়ে জল
পান করি; সেই পায় হাত বুলিয়ে দি।
তুমি আজ তোমার ইষ্টদেবতার আশ্রয়
পেয়েছ। স্বামীর কাছে মনের কথা লুকুতে
যে কি হয়, তা আমি জানি! তবু, মা,
আমার একটা কথা রেখ।'

'কি, মা? আমার এত ক'রে বলছ
কেন? কি কথা, বল না।'

'মা, সস্তানের কুচরিত্রের কথা বলতে
হ'লে লজ্জায় মুখে বাধে। সস্তানের নিন্দা-

নব-বিবাহিতার কাহিনী

অখ্যাতে যে, মনে কি হয়, তা মা হ'লে বুঝবে! আমার একদণ্ড সোয়ান্তি নেই। রাত্রে ঘুমুই, থেকে-থেকে চমকে উঠি। মনে হয়, হয় ত সে কোথায় চোরের মার খাচ্ছে! মা, স্বামি-নিন্দা করতে নেই, আমার কপাল-দোষে ছেলে চোর! কিন্তু কুটুম-বাড়ীতে, জামায়ের কাছে এ-কথা প্রকাশ হ'লে আমার বড় মনস্তাপ হবে। তুমি, মা, আমার গা ছুঁয়ে বল, আমার ছেলে আছে, তোমার সে ভাই, এ-সব কথা কখনও প্রকাশ করবে না? মা, আমার জামায়ের কাছে তোমার এ-কথা লুকুতে যদি কোন পাপ হয়, তা আমার।'

আমি জ্যেঠাইমাকে কথা দিলুম। সেই সময় দাদা কোথা থেকে ফুলের মালা, ফুলের গহনা এনে জ্যেঠাইমাকে বললে, 'ওকে পরিয়ে দে, আমি কিনে এনেছি।'

সীমন্তিনী

জ্যোঠাইমা ষড়্ ক'রে আমাকে সেগুলি পরাতে-পরাতে একটা নিশ্বাস ফেলে বললেন, ছোট বউয়ের একুগা গয়না ছিল—

আমি আর তাঁকে বলতে দিলুম না। তাঁর মুখ চেপে ধ'রে বললুম, 'সে-সব দাদার বৌ এসে পরবে।'

তারপর দাদাকে বললুম, 'দাদা, জ্যোঠাইমা বারণ করছেন, তুমি আমার খসুর-বাড়ীতে কখন যেনো না।'

দাদার মুখখানা কেমন হয়ে গেল! খানিক চূপ ক'রে থেকে বললে, 'আচ্ছা। কিন্তু তোকে যখন দেখতে ইচ্ছে হবে, লুকিয়ে-লুকিয়ে দেখে আসব।'

এ-কথায় আমি আর কি বলব? কিন্তু আমার মনে ভয় হ'ল। শুনেছি, আমার খসুরেরা বড়-লোক। সেখানে যাবে, কবে

নব-বিবাহিতার কাহিনী

কি লোভে পড়বে, কথাটা বেশী ক'রে
ভাবতেও আমার সাহস হ'ল না।

আমাকে বিষণ্ণ ও চিন্তিত দেখে দাদা
বললে, 'তুই মনে দুঃখ করিস্ নি, আমাকে
যেতে বারণ করতে তো'র মনে ক্লেশ হয়েছে।
তুই জানিস্ ত, ভাই, আমার স্বভাব। আজ
আমার দুঃখ হচ্ছে, কেন এমন হলুম ! জামাই-
বাবুর সামনে বেরুতে পেলুম না !' কিন্তু
তখনি সে মনের দুঃখ চেপে নিলে, ফোঁস্ ক'রে
একটা নিশ্বাস পড়ল, আমি বুঝলুম। ঠাট্টা
ক'রে বললে, 'মা, শালার কাণ মলবার সঙ্গে
আমার হাত শুড়-শুড় করছে। তুই
অমন প্যাঁচা-মুখ ক'রে ব'সে আছিস্
কেন ?'

এ-কথার উত্তর আমি আর কি দেব ?
জ্যোঠাইমা বললেন, 'ওর বে ব'লে কি ও

সীমন্তিনী

নেচে বেড়াবে না কি ? সবার চেয়ে আজ
ওরই বেশী লজ্জা ।’

‘কেন, মা, ও ত কারুর কিছু চুরি করে
নি যে, লজ্জা হবে ।’ কথাটা বলেই দাদা
আবার একটা দীর্ঘ নিশ্বাস ফেললে । তারপর
আমায় বললে, ‘শোন, আমাকে দেখবার
জন্মে তোর মন কেমন করবে । আমি তা’র
উপায় করেছি । তোর খসুর-বাড়ীর দক্ষিণে
একটা মস্ত মাঠ আছে আর একটা অশথ গাছ
আছে—জান্না দিয়ে দেখা যায় । আমি
মাঝে-মাঝে বিকেলে গিয়ে সেই গাছতলায়
ব’সে থাকব । তুই জান্নায় দাঁড়ালেই
আমায় দেখতে পাবি ।’

হায়, ভাই-বোনে দেখা করব, তার এত
ফন্দি-ফিকির, লুকোচুরি ! আপাততঃ সেই
কথাই রইল ।

নব-বিবাহিতার কাহিনী

ফুল প'রে স্ত্রীঠামশায়কে প্রণাম করতে গেলুম। তিনি ত চ'টেই আঙন! বললেন, 'তুই আবার এ সব ফুল পেলি কোথা? আজ-কাল্কার ছেলেরা! সাজ-গোজ, গয়না-পরা পছন্দ করে না। এ বুদ্ধি তোকে কে দিলে?'

ভয়ে, লজ্জায় আমি যুত প্রায় হ'য়ে গেলুম। আমার অবস্থা দেখে দাদা তাড়াতাড়ি বললে, 'ও সব আমি যোগাড় ক'রে এনেছি, ওর দোষ নেই।'

যোগাড়ের অর্থ স্ত্রীঠামশায় বিলক্ষণ বুঝতেন। বললেন, 'এ সব বাজে-জিনিসের চেয়ে তরকারি-পাতি যোগাড় করলে সংসারের উপকার হয়।'

বাপের দোরাআই ত দাদার স্বভাব এখন বিগড়েছে! যা-হ'ক, স্ত্রীঠামশায়কে প্রণাম

সীমন্তিনী

ক'রে, ঞ্চোঠাইমার পায়ের ধূল মাথায় ধ'রে
আমি নূতন সঙ্গী নিয়ে, নূতন স্থানে, নূতন
সংসার পাত্‌বার জন্তু ষাজা কবুলুম। স্নিগ্ধ,
শ্রাম-ছায়াচ্ছন্ন পল্লীপথে পদার্পণ ক'রে মনে
হ'ল, এ যেন সে চির-পরিচিত পথ নয়, আমার
সামনে যেন সুদীর্ঘ সংসারের পথ প'ড়ে
রয়েছে! কে জানে, কোথায় এর শেষ!
এ পথ কি নিষ্কণ্টক, না বিঘ্ন সঙ্কুল? ষা'ই
হ'ক, পথে যদি কাঁটা থাকে, আমার স্বামীর
পায়ে তা ফুটতে দেব নু। পারি, পথ থেকে
তুলে নেব, নয়, বুক পেতে দেব।

আমার বিবাহে বরষাত্রী, কন্যষাত্রী
কেউ ছিল না। আত্মীয়-স্বজন, কেউ যে
নিমন্ত্রিত হয় নি, সে কথা বলাই বাহুল্য।
স্বামী আমার হাত ধ'রে পালকীতে তুলে
দিলেন আর সেই সময় আমার কাণে-কাণে

নব-বিবাহিতার কাহিনী

জিজ্ঞাসা করলেন, 'তুমি স্বর্গের ইন্দ্রাণী, না
মর্ত্যের ফুলরাণী?' আমার সর্কশরীর সোহাগে,
পুলকে কণ্টকিত হ'য়ে উঠল। জ্যোঠামশায়ের
কথায় যে ভয় পেয়েছিলুম, তা দূর হ'ল।
কিন্তু লজ্জায় মুখে কথা সরল না। মনে-মনে
বললুম, 'আমি তোমার দাসী।'

নায়েকের কাহিনী

আমার বয়স বাইশ, তাহার বোল ; এক
বৎসর হইল, আমাদের বিবাহ হইয়াছে ।

বিবাহের পর যখন প্রথম প্রণয়-মোহে মন
অভিভূত হয়, সে-অবস্থা বুঝাইবার প্রয়াস
বৃথা । সে আগ্রহের মিলন, মিলনে অতৃপ্তি ;
সে দূরে-দূরে বাক্-প্রসারণ, শূন্যে-শূন্যে আলি-
জন ; চোখে-চোখে কথা, চুরি ক'রে হাসি ;
সে স্পর্শের মাদকতা বুঝাইবার ভাষা
কোথায় ?

লোকে আমাকে স্ত্রী বলিত । কথাটা
শ্রেষ হইলেও সত্য এবং আমি উহা স্মৃতি-স্বরূপ
গ্রহণ করিতাম ।

কলিকাতায় লেখাপড়া শেষ করিয়া আমি

নায়কের কাহিনী

দেশে আসিলাম । উপার্জনের প্রয়োজন ছিল না ; প্রলীগ্রামে নিশ্চেষ্ট জীবন কতক অধ্যয়ন করিয়া, কতক মৎস্য ধরিয়া কাটাই-
তাম ।

একদিন আমাদের গ্রামের বহুদূরে এক পুকুরে মাছ ধরিতে যাই । পুকুরিণীটী, বোধ হয়, নিরামিষ । সারাদিন বসিয়া-বসিয়া উঠিব মনে করিতেছি, সহসা নীরব সন্ধ্যা মুখরিত করিয়া বালিকাসুলভ কলহান্ত উঠিল । আমি চকিতে পরপারের দিকে চাহিলাম । দেখি-
লাম, যার সে হাসি—সে কিশোরী । মাছ ধরিতে আসিয়াছিলাম, ধরা পড়িলাম—আমি ।

সন্ধ্যানে জানিলাম, সে সুহাসিনী অবিবাহিতা ; তাহার জ্যেষ্ঠভাতের বাড়ীতে অনাদরে প্রতিপালিতা । তাহার পিতা-মাতা কেহই ছিল না । মাতা 'সতী' হইয়াছিলেন । আমারও

সীমন্তিনী

পিতা-মাতা ছিলেন না, সংসারের কর্তী—
মাসীমা। বয়স্কা কন্যা হইলেও নিৰ্ব্বিল্পে
আমাদের বিবাহ হইয়া গেল।

যে পরিমাণ অর্থে পরিমিতব্যয়ী মানুষ
স্বখে থাকিতে পারে; ততটুকু বিছা থাকিলে
মূর্থ-অভিধান হইতে আত্মরক্ষা করা যায়,
অথচ মনে পাণ্ডিত্যের অভিমান জন্মে না,
ততটুকু আমার আয়ত্তে ছিল। তা'র উপর
এই সুহাসিনী, কিশোরী জায়া লাভ করিয়া
মানব-জীবনের নখরতা বা সংসারের অসারতা
উপলব্ধি করিবার জন্য আমার কোনরূপ
বাস্ততা ছিল না। সুতরাং, সঙ্ঘার পর
বেদান্তের পরিবর্তে সঙ্গীতচর্চা করিতাম।
আমার স্ত্রী সেতারে স্বর দিতেন, আমি
গাইতাম, বিধাতা আমায় সুকণ্ঠ করিয়াছিলেন।

সেতারে আমার স্ত্রী সুদক্ষ ছিলেন না।

নায়েকের কাহিনী

সঙ্গে স্বর দিতে আর একধনিমাত্র গীত বাজাইতে পারিতেন—‘জনম্-জনম্ হাম্ রূপ নেহারনু, নয়ন না তিরপিত ভেল।’ আমি যখন তাঁহার মুখ চাহিয়া এই গীতটি গাইতাম, বোধ করি, তাঁহারও হৃদয়ের কোন তारे ঝঙ্কার উঠিত; কণ্ঠে তাহা প্রকাশ করিতে না-পারিয়া সেতारे বাজাইতে শিথিয়াছিলেন।

ক্রটিহীন মানুষ হয় না, কিন্তু আমার সকল অভাব স্ত্রী মনে-মনে পূর্ণ করিয়া লইয়া-ছিলেন। আমার রূপ ছিল না, অথচ তাঁহার দৃষ্টিতে আমি সাক্ষাৎ কুমার; পাণ্ডিত্যে চাণক্য; বুদ্ধিতে বৃহস্পতি। এক-কথায় আমি একজন অলৌকিক-শক্তিসম্পন্ন মহা-পুরুষ। পাচিকা যখন দুধ জাল দিত, সে-সময় স্ত্রীকে নিঃশব্দ পদসঞ্চারে বাইতে দেখিলে আমি যদি বলিতাম, ‘তুমি কোথায় যাচ্ছ,

সীমন্তিনী

বল্ব ? লুকিয়ে আমার হৃদে জল মিশুচ্ছে
কি না তাই দেখতে ।’ তিনি অমনি দুইটি
বিস্ময়-বিস্ফারিত চক্ষু আমার মুখের উপর
স্থাপন করিয়া, কিশলয়-কোমল হস্তে আমার
মুখ চাপিয়া ধরিয়া বলিতেন, ‘চূপ, চূপ, তুমি
নিশ্চয় জান্ !’ সে হস্তের স্পর্শে আমার
দেহ, মন, প্রাণ, অস্থি, মজ্জা, শোণিত,
সব শিহরিয়া উঠিত—নীতল-নীকর-সম্পূর্ণ
সূর্য-স্পর্শে কদম্ব-কানন যেমন কণ্টকিত
হইয়া উঠে !

এই বালিকা-স্বী সংসারের ভ্রাতাবধান
করিতেন, যেন কৃত কালের পাকা গৃহিণী ।
আমি তাঁহার কার্যকলাপ দেখিয়া বিস্ময়
প্রকাশ করিলে বলিতেন, ‘ফুলকে কি ফুটে
ব’লে দিতে হয়, না সাপকে ফণী ধবুতে
শেখাতে হয় ?’

নায়েকের কাহিনী

আমি চিরকালই এলোমেলো, অগোছ ।
জুতাষোড়াটা প্রায়ই পড়িয়া থাকিত তেতলার
ছাদে ; ছড়িগাছটা কখন খিড়কীতে, কখন
দেউড়ীতে ; চাদরখানা কখন কুমড়ার মাচায়,
কখন একটা ভাঙ্গা দাঁড়ে ; আর জামাটা—
আমার গায়ের সঙ্গে তা'র অতি ঘনিষ্ঠ সম্বন্ধ
হইলেও, কখন যে কোথায় থাকিত, তাহার
ঠিক ছিল না । এক-কথায় আমি যেখানে
থাকিতাম—তাহাদের কেহই সেখানে থাকিত
না । অগচ, এখন দেখিতে পাই, তাহারা
সকলেই ভালমানুষের মত আমার অপেক্ষায়
বসিয়া আছে ।

মাসীমা সংসার এবং আমাকে এই বালিকা
গৃহিনীর হস্তে সম্পূর্ণভাবে সমর্পণ করিয়া
নিশ্চিত মনে হরিণাম করিতে লাগিলেন ।

দেশে আসিয়া অবধি আমি আর

সীমন্তিনী

কলিকাতায় যাই নাই। দীর্ঘকাল অদর্শনে
বন্ধুবর্গের পরিহাস এবং শ্লেষ-বাক্যে অতিষ্ঠ
হইয়া আমার স্ত্রী একদিন জেদ্ করিয়া
আমায় কলিকাতায় পাঠাইয়া দিলেন।
আমি নিতান্ত বিষণ্ণ হইয়া চলিলাম।

আমাদের দেশ হইতে কলিকাতায়
আনিবার পথ দুর্গম না হইলেও সহজ নহে।
প্রথম কিছুদূর পাল্কীতে আসিতে হয়,
তারপর নোকায়। সহরে পৌঁছিতে প্রায়
এক জোয়ার লাগে। উজ্জাইয়া যাইতে হইলে
অস্তুতঃ দ্বিগুণ সময়ের প্রয়োজন। আমি
সময় মাপ করিয়া পাল্কীতে উঠিয়াছিলাম।
পথে নানা কারণে বিলম্ব হওয়ায় জোয়ার
বহিয়া গেল। উজ্জানে যাইলে সেদিন আর
ডাক-গাড়ী পাওয়া যায় না। বিধাতাকে
ধন্যবাদ দিয়া কৃতজ্ঞ হৃদয়ে বাটী ফিরিলাম।

নায়কের কাহিনী

যখন বাড়ী পৌঁছলাম, তখন সন্ধ্যা।
এই সময় স্ত্রী খিড়কীর বাগানে বসিয়া
আমার জন্য মালা গাঁথিতেন! যেদিন
আমি উপস্থিত থাকিতাম না, আমার একখানি
ছোট তৈলচিত্র সেই মালায় সজ্জিত হইত।
আমি আসিয়াই উচ্চান্নাতিমুখে চলিলাম।

কি সুন্দর! সেদিন, বোধ করি, পূর্ণিমা।
নারিকেল-কুঞ্জের অস্তরাল হইতে অরুণ-
কুম্বলিগু পূর্ণ শশধর প্রসন্নহাস্ত বর্ষণ করিতে-
ছেন। জল, স্থল, আকাশ, বাতাস, তরু-লতা,
ফুল-পাতা, সে-হাসিতে সবই হাসিতেছে।
আমার সেই নিত্যদৃষ্ট উদ্যানখানি আজ
কৌমুদী-গঠিত কাম্যবন বলিয়া ভ্রম হইতে
লাগিল। হায়, এই ভূস্বর্গ ছাড়িয়া যাইতে-
ছিলাম—ধূলি-ধূম-ধূসর কলিকাতায়!

উদ্যানে আসিয়া আমার মনে হইল, স্ত্রীর

সীমন্তিনী

সম্মুখে আচম্বিতে, অপ্রত্যাশিতভাবে উপস্থিত হইয়া তাঁহাকে চমকিত করিয়া দিব। খুব সংযতভাবে, নিঃশব্দে, বৃক্ষের অস্তুরালে-অস্তুরালে, অলক্ষিতে অগ্রসর হইতে লাগিলাম। কোতুকে, আগ্রহে, উৎসাহে, আমার দেহমন থরথর করিয়া কাঁপিতেছে। সহসা শুনিলাম, আমার স্ত্রী এক যুবাকে লক্ষ্য করিয়া বলিতেছেন, 'তুমি এখানে কেন এলে? ভাগ্যে ইনি আজ কল্কেতায় গিয়েছেন!'

আমার চোখে যেন সেই পরিষ্কৃত চন্দ্রা-লোক সহসা নিবিয়া গেল! আমি একটা বৃক্ষ-কাণ্ডে মাথা রাখিয়া দাঁড়াইলাম। 'ভাগ্যে আজ ইনি কল্কেতায় গিয়েছেন!'—ভাগ্য! যাহার সঙ্গে কণিক বিচ্ছেদ আমি নিরবাসন-দণ্ড বলিয়া ভাবিতেছিলাম, তাহার পক্ষে সেটা ভাগ্য! বোধ করি, পরম সৌভাগ্য,

নায়কের কাহিনী

নহিলে প্রণয়ীর সঙ্গে গোপন-সাক্ষাৎ করিবার
এমন শুভ সুযোগ, নির্ঝিল্ল অবকাশ কেমন
করিয়া হইত ! তাই আমায় কলিকাতায়
পাঠাইবার জন্ত এত জেদ, এত পীড়াপীড়ি,
এত অনুরোধ ! মূৰ্খ আমি সে-কথা বুঝিতে
পারি নাই । আমি মূঢ়, তাই বালিকার ছলে
ভুলিয়াছি ! আমার মনে হইতে লাগিল,
চারিদিক হইতে বৃক্ষপত্র সকল তরতর মরমর
করিয়া বলিতেছে—প্রতারিত, প্রতারিত,
প্রতারিত মূঢ় ! আর প্রত্যেক ফুলটী বিদ্রূপ
করিয়া হাসিতেছে !

হায়, কেন আমি গৃহে ফিরিলাম ! এ
মৰ্মাস্তিক দৃশ্য না-দেখিলে আমার কি ক্ষতি
ছিল ! আমার সরল বিশ্বাস, নির্মল ভালবাসা
লইয়া নিশ্চিত অন্তরে দিন কাটাইতাম !
হায়, কেন নদীর জোয়ার বহিয়া গেল !

সীমন্তিনী

সঙ্গে-সঙ্গে যে আমার জীবনের জোয়ারও
চলিয়া গেল !

কি উদ্বেলিত আনন্দেই বাটা ফিরিয়া
আসিতেছিলাম ! কতক্ষণে স্ত্রীকে দেখিব,
মাথা-মুণ্ড কত কি বলিব, সারাপথ তা'ই
ভাবিতে-ভাবিতে আসিয়াছি। ভাবিয়া-
ছিলাম, তাহার মালাগাঁথা দেখিয়া কোতুকে
জিজ্ঞাসা করিব—‘কার তরে আর গাঁথ
হার যতনে !’ যাহাকে জিজ্ঞাসা করিব, সে ত
ঐ দাঁড়াইয়া রহিয়াছে—কয়েক হস্তমাত্র
দূরে ! কই, মুখের কথা মুখেই রহিল, কিছুই
ত বলা হইল না !

‘কার তরে আর গাঁথ হার যতনে !’—
হার ত তাহার হাতেই রহিয়াছে ! বোধ
করি, অস্ত-ব্যস্ততায় ছিঁড়িয়া গিয়াছে।
চারিদিকে ফুল ছড়াইয়া পড়িয়াছে। সাধের

নায়কের কাহিনী

হার আর কি গাঁথা হইবে না? না—না—না!
কত ছিন্ন হার এমনই ছড়াইয়া পড়িয়া থাকে,
আমারও থাকিবে। হায়, এক মুহুর্তে কি
নিদাক্ষণ পরিবর্তন! যাহাকে দেখিতে
আসিয়াছি, সে ঐ—ঐ! যে দেখিতে
আসিয়াছে, সে-ও এই! কিন্তু হায়, মাঝে
কি স্তনীর্ঘ মধুময় ব্যবধান!

এই 'ত' সেই মধু-যামিনী! ঐ স্বচ্ছ নীল
জ্যোৎস্না-বিলসিত অশ্বরের অন্তরালে কোথায়
এমন মর্ম্মভেদী বজ্র লুকাইয়াছিল! কে
জানিত, এই কোমুদীশালিনী, কুমুমমালিনী
মেদিনীর মধুময় হাসি এমন তীব্র হলাহল
লুকাইয়া রাখিয়াছে! কে জানিত, এই
ষোড়শবর্ষীয়া বালিকার হৃদয়ে এত চাতুরী!
হায় ... মাধুরী-লতা বলিয়া যাহাকে
হৃদয়ে ধারণ করিয়াছি, সে সর্পিণী! 'সতী'র

সৌমস্বিনী

কন্যা বলিয়া আমারে গৃহে আনিয়াছি ! সমাজ-
বিধি মানি নাই, বয়স্কা কন্যা বিবাহ করিয়াছি,
কেবল প্রতারণিত হইবার জন্য ! নিশ্চয় এ
সমতানী বিবাহের পূর্বে আর কাহাকে
হৃদয় সমর্পণ করিয়াছিল। হায়, এই সংসার,
এই নারী, এই দাম্পত্য-জীবন !

আমার স্ত্রীর সন্মুখে সে যুবককে দেখিয়াই
আমি লজ্জায় চক্ষু ফিরাইয়াছিলাম। লজ্জা ?
কিসের লজ্জা ? বিশ্বাস-ভঙ্গের লজ্জা ! প্রত্যয়
করিয়া প্রতারণিত হইয়াছি, সেই লজ্জা ! স্ত্রী
অসতী, সেই লজ্জা ! লাহিত, লজ্জিত হইবার
লজ্জা ! যখন আবার দেখিলাম, তখন সে
যুবক চলিয়া গিয়াছে। বোধ করি, আমার
আগমন সে দেখিতে পাইয়াছিল, তাই
পলাইয়াছে। মনে পাপ না থাকিলে পলায়
কেন ? কে এ যুবক ? কে এ ? মনে হইল,

নায়কের কাহিনী

যেন কোথায় দেখিযাছি । কোথায় ?
কোথায় ? আমার শয়নকক্ষের পার্শ্বে
মাঠের উপর অশ্বখতলায়, মনে হয়, যেন
ইহাকে কখন-কখন দেখিযাছি । বোধ হয়,
এ মে-ই ।

চাঁদ ক্রমে ধীরে-ধীরে নারিকেল-কুণ্ডের
শিখরে আসিয়া দাঁড়াইল ! আমার স্ত্রী অনেক-
ক্ষণ ধরিয়া নির্নিমেষ নয়নে তাহার পানে
চাহিয়া রহিল । তারপর তাহার অস্তিত্ব
হইতে একটা গভীর দীর্ঘশ্বাস উখিত হইল ।
এ কি অতৃপ্ত প্রণয়ের কোভ ? কিছুক্ষণ পরে
সে হার ছিন্ন দেখিয়া চ্যুত কুম্মগুলি পুনরায়
কুড়াইতে বস্তুবতী হইল । কিন্তু সে-সময়
বোধ হয়, তাহার মনও সেই কীর্ণ কুম্মরাশির
মত বিক্লিষ্ট হইয়া পড়িয়াছিল । কুড়াইতে
পারিল না ; ছিন্ন মালা লইয়াই গৃহাভিমুখে

সৌমস্বিনী

ফিরিল। আমিও বৃক্ষান্তরাল হইতে অগ্রসর হইলাম।

আমাকে দেখিয়াই সে শিহরিয়া উঠিল। আনন্দে নয়, ভয়ে। তারপর যেন তা'র মুখ হইতে আপনা-আপনি বাহির হইল—‘তুমি!’

‘হাঁ, আমি।’

সে চকিতে একবার চারিদিক্ চাহিয়া পুন-
রায় জিজ্ঞাসা করিল, ‘কতক্ষণ এয়েছ?’

আমি উত্তর দিলাম, ‘এই ত আসছি।’

ইতিপূর্বে আমার মুখে কখন মিথ্যাকথা শুনে নাই, সে বিশ্বাস করিল এবং আশ্বস্ত হইল। আরামের একটা মুহূ নিশ্বাস শুনিলাম। তারপর আমি উচ্চৈঃস্বরে হাসিয়া ফেলিলাম। সে চকিত হইয়া আমার হাত ধরিয়া বলিল, ‘ঘরে চল।’

তাহার স্পর্শে আমার শরীরে যেন অসহ

নায়েকের কাহিনী

আমার সকার হইল। অতি কষ্টে আপনাকে সংযত করিয়া গৃহে ফিরিলাম—আমার শয়ন-কক্ষে। হায়, বিদায়-কালে বুঝিতে পারি নাই, এ স্থলের স্বর্গ হইতে চির-বিদায় লইতেছি ! এ কোন্ সমাধিক্ষেত্রে ফিরিয়া আসিলাম ! আমার বিশ্বাস, ভালবাসা, সুখ, আশা, হৃদয়, সবই যে এখানে সমাহিত হইয়াছে ♣

আমি শয্যার উপর বসিলাম। সে আমার পদমূলে বসিল। কিছুক্ষণ চুপ করিয়া থাকিয়া জিজ্ঞাসা করিল, ‘অমন ক’রে হাস্ছিলে কেন ?’

আমি উত্তর দিলাম, ‘তোমাকে দেখে হাস্বে না তু কি কাঁদ্ব ?’

সে বলিল, ‘তা কেন ? তবে কল্কেতায় গেলে না কেন ?’

হঠাৎ আমার মুখ দিয়া বাহির হইয়া গেল

সীমন্তিনী

—‘ভাগ্যে!’ কিন্তু পরক্ষণেই সংযত হইয়া বলিলাম, ‘জোয়ার ব’য়ে গেল যে!’

আমি শয্যার উপর স্থিরভাবে বসিয়া—সে কি বলে, অনিবার অপেক্ষায়। সে-ও নীরবে নতমুখে বসিয়া সেই ছিন্ন হার লইয়া নাড়া-চাড়া করিতে লাগিল। আমি বসিয়া-বসিয়া ভাবিতে লাগিলাম, এর মনে যদি কোন পাপ না-থাকে, নিশ্চয়ই সকল কথা খুলিয়া বলিবে। সে কি ভাবিতেছিল, জানি না। বোধ করি, সে-ও মনে করিতেছিল, আমি কিছু বলিব। বলি-বলি অনেকবার মনে করিয়াছি, কিন্তু লজ্জায় যে মুখে কথা সরিতেছে না! অনেকক্ষণ চূপ করিয়া থাকিয়া সে জিজ্ঞাসা করিল, ‘হাস্ছ না কেন?’

হায়, মন না-হাসিলে কি মুখ হাসে?
বলিলাম, ‘এই ত হাস্ছি।’

নায়কের কাহিনী

‘ও কী হাসি ! কথা কচ্ছ না কেন ?’

‘এই ত কথা কচ্ছি ।’

তারপর সে আমার কাছে আসিয়া হাত ধরিয়া জিজ্ঞাসা করিল, ‘কি হয়েছে বল না ?’

তা’র সে কাতর চক্ষু দেখিয়া, ব্যাকুল স্বর শুনিয়া আমার অন্তর আরও উত্তপ্ত হইয়া উঠিল। কুটিল, কুটিল, কুটিল! এই বালিকা—এত ছল শিথিল কোথা হইতে ? সয়তানী সত্যই বলিয়াছিল, ‘সাপকে কি ফণা ধরতে শেখাতে হয় ?’ কিন্তু কেবল স্ত্রী-লোকই কুটিলতা জানে, পুরুষ কি জানে না ? আমি উত্তর দিলাম, ‘আজ জানতে পেরেছি, আমার সর্বপ্রধান জমিদারীটা নীলমেয়ে উঠেছে, আর একজন ডেকে নিয়েছে। এই জমিদারীটাই আমার সর্বস্ব, আমার সৌভাগ্য-প্রদত্ত জায়গীর ! আমি ফকির হব—ফকির হব !’

দয়া-মমতা-হীন বিচারপতির স্থায়, যুগযুগান্ত
ব্যাপ্তির মত তাহাকে লক্ষ্য করিতেছে ।

তৃতীয় দিন—ঘোর দুর্দিন ! আকাশ ঘন
কৃষ্ণ মেঘে আচ্ছন্ন—বিশ্ব-সংসারের উপর যেন
যবনিকাপাত হইয়াছে ! বজ্র, বিদ্যুৎ, বাতাস,
বারিপাতের আজ যেন মহোৎসব ! কখন
নারকীয় কোলাহল, কখন পৈশাচিক রোদিন-
ধ্বনি ! এ কি উন্মাদ অভিনয় ! আমার শয়ন-
কক্ষের পাশের মাঠে সেই যে একটা বৃহৎ
অশ্বখগাছ ছিল—যার তলার সেই যুবাকে
দাঁড়িয়ে থাকতে দেখেছি—বাতাস হৈ-হৈ
ক'রে এসে তা'র একটা মস্ত ডাল ভেঙ্গে দূরে
আছড়ে ফেলে দিলে, আবার তখনই আর্শ্বথরে
কঁদে উঠল ! এই উন্মাদিনী প্রকৃতির সঙ্গে
উন্মত্ত হইয়া মাতামাতি করিবার জন্ত—আমার
সমস্ত হৃদয় যেন মাতিয়া উঠিল ! বাই, নদী-

নায়কের কাহিনী

বকের উপর ছুটিয়া গিয়া পড়ি ! রক্ততালে
তরঙ্গ নাচিবে, তরী তুলিবে, আমিও নাচিতে-
নাচিতে তলাইয়া যাইব ! কি মজা, কি মজা !
আমি হো-হো করিয়া হাসিয়া বাহির হইলাম।
ত্রিভুবন চমকিত করিয়া সহসা একটা বজ্রপাত
হইল। আমার পা যেন আপনা-আপনি পিছাইয়া
আসিল ! হো-হো-হো,—মৃত্যুভয় কি মানবের
মজাগত ? আমার হাসির শেষে, কি অল্প
কোন কারণে বলিতে পারি না, পুনরায় যেমন
পা বাড়াইয়াছি, ত্রী ছুটিয়া আসিয়া আমার
পায়ের উপর পড়িল। কাতর নয়নে আমার
মুখের পানে চাহিয়া অতি ব্যাকুলত্বের জিজ্ঞাসা
করিল, 'এমন দুর্ঘ্যোগে তুমি কোথায় যাচ্ছ ?'

'কল্কেতায় ।'

'এ দুর্ঘ্যোগে লোকে শ্যাল-কুকুর তাড়ায়
না, আমি কেমন ক'রে তোমায় ছেড়ে দেব ?'

সীমন্তিনী

‘তুমিই ত যাবার জন্য পীড়াপীড়ি ক’রে-
ছেলে !’

‘সেজন্য যদি রাগ ক’রে থাক, আমার
মাপ কর । আজকের দিনটা থাক । বাড়-বৃষ্টি
থামলে যেও ।’

‘পা ছাড় ! মিছেদেরি করিও না ! আজও
আবার জোয়ার ব’য়ে যাবে । আমি যখন
যাব মনে করেছি, যাবই । যে বাড়-বৃষ্টির
বাধা মান্ছে না, সে কি কারুর কথায়
থামবে ?’

‘কেন থামবে না ? কেন যাবে ?’

‘তোমার ত বলেছি. আমার সর্বনাশ
হয়েছে ।’

‘বালাই ! কি সর্বনাশ ? সেই জমিদারী
নৌলম ? তুমি আমার ইষ্টদেবতা ! তোমার
মুখে কখন মিছে কথা শুনি নি ! সত্যি বল,

নায়কের কাহিনী

‘যদি নীলম হয়ে থাকে, সে দোষ কি আমার ?
আমার ওপর কেন রাগ করছ ?’

‘কে বললে, তোমার ওপর রাগ করছি ?’

‘আমার মন । ছেলেবেলা বাপ-মা আমার
ফেলে গিয়েছেন । জ্যেষ্ঠার বাড়ীতে ফেলা-
ভাতে অতি দুঃখে মানুষ হয়েছি । সে কী দুঃখ,
তুমি জান না ! কিন্তু তোমার পেয়ে সব
ভুলেছিলুম । তোমায় পাব কখন আশা করি
নি । তুমি দয়া ক’রে আশ্রয় দিয়েছিলে,
ভিখারিণী—রাজরাণী হয়েছিলুম । আবার
আমায় নিরাশ্রয় করছ কি দোষে ? যদি না-
জেনে কোন দোষ ক’রে থাকি, আমায় ক্ষমা
কর ।’

‘পাগল ! তোমার দোষ কি যে ক্ষমা
করব ?’

‘তবে কেন যাচ্ছ ?’

সীমন্তিনী

‘ঐ একশ বার এক কথা! কতবার
বলব?’

‘আচ্ছা, না-বল, আমায় পায় ঠেল না!
শোন! আমার ভারি মন কেমন করছে!
বাবা, মা মরুবার আগে এমন মন কেমন
করেছিল। তুমি চ’লে যাচ্ছ, আবার তেমনি
মন কেমন করছে। আমার কেবলই মনে
হচ্ছে, আর তোমায় দেখতে পাব না।’

‘না-পেলে কতি কি?’

‘সে তোমায় বোঝাতে পারব না। আমি
অবলা, আর কিছু জানি নি, কেবল তোমায়
জানি। আমি কেবল তোমার সেবা করতে
পারি, যদি দয়া ক’রে নাও। নইলে কাঁদতে
পারি, সাধতে পারি, পায় ধরতে পারি;
তোমার কাছে ভিক্ষা করতে পারি, আর
তোমার জন্ত মরতে পারি। আমি অবলা,

নায়কের কাহিনী

আর কিছু জানি নি, কেবল তোমার জানি ।
জানি নি, কি কথা বললে তোমার মনে দয়ার
উল্লেখ হবে ! আমার দয়া কর, ভাসিয়ে
দিয়ে যেও না । আমি বড় দুঃখিনী ।’

‘কিসের দয়া ? কি দুঃখ ? পা ছাড় ।’

বোধ হয়, পদদ্বারা একটু জোরে তাহাকে
ঠেলিয়া দিয়াছিলাম । তাহা ক্র কোথাও আঘাত
লাগিয়াছিল । সে গুমরিয়া কাঁদিয়া উঠিল ।
আমারও মনে যেন একটা কাঁটা ফুটিল ।
সে বলিল, ‘মিতাকুইপায় ঠেলবে ? কমা
কর্বে না ? কি দোষে আমার ত্যাগ ক’রে
চললে—তা’ও ব’লে গেলে না ?’

‘কি বিপদ ! তোমার কোন দোষ নেই—
নেই—নেই ! আর মিছে বাধা দিয়ো না ।
জোয়ার ব’য়ে যাবে ।’

সে আমার পদধূলি লইয়া বলিল, ‘আমি

সীমন্তিনী

তোমায় বাধা দেবার কে ? আমি কীটগু-
কীট ; তুমি মাড়িয়ে চ'লে যেতে পার ।
হায়, হায়, তোমার জোয়ার ব'য়ে যাবে,
আমার যে জীবন ভেসে যাবে ! এই যদি
মনে ছেল, কেন আমায় ভালবেসেছিলে ?
কেন ভালবাসতে শিখিয়েছিলে ? আমি
কাঙালিনী, জ্যেষ্ঠ বাদীতে বাসন মাজ্ তুম—
ভাত খেতুম, কেন আমায় এমন স্বর্গের ছবি
দেখিয়ে আমার মনে সহস্র সাধ জাগিয়েছিলে ?
হায়, হায়, কপাল কি এমনি করেই ভাঙতে
হয় ? এমনি করেই কি বাদ সাধতে হয় ? এ
কি পুতুলখেলা ? বুঝ না, আমি পুতুল
নই—মানুষ ? আমার জীবন-মরণ যে তোমার
হাতে !

‘ভাল, কে মরে কে বাঁচে,- সে পরে
বোঝা যাবে ! এখন ত পথ ছাড় ।’

নায়কের কাহিনী

‘আচ্ছা, তুমি এস। তোমায় আর বাধা দেব না। কিন্তু, জেনো, আমি তোমারই জন্য প্রাণ রাখব। তোমার পায় প্রণাম করি, তোমার কাছে আমি এই বর নিচ্ছি। তুমি বিমুখ হলেও আমার দেবতা। আমি তোমায় না-দেখে মরুব না। যদি তোমার পায় আমার ভক্তি থাকে, আমি সতীর মেয়ে হই, তোমাকে আবার এসে দেখা দিতে হবে, তবে আমি মরুব।’

‘হা—হা—হা,—সতীর মেয়ে সতী—সীমন্তিনী! বেশ ত! সাবিত্রী ঘটালয় থেকে সত্যবান্কে ফিরিয়ে এনেছিলেন। যে পারে, তা’র করে।’

আমার পদধূলি লইয়া—এই ‘আমার বর’—বলিয়া সে সরিয়া দাঁড়াইল। আমি আর তাহার দিকে ফিরিয়া চাহিলাম না।

সীমন্তিনী

আমার মনে হয়, সকল মানুষেরই ভিতর একটা ক'রে ভূত থাকে। সে বেশ নিশ্চিন্ত হ'য়ে ঘুমায়ে, কিন্তু আগিলে মহা উপদ্রব আরম্ভ করে। তখন সে সামনে যা পায়, তাই ভাঙ্গিয়া-চুরিয়া তছনছ করিতে চায়। খিড়কীর বাগানে আমার স্ত্রীর সম্মুখে সে দিন সে যুবাকে দেখিয়া অবধি আমার মনের ভূতটা আগিয়া উঠিয়াছে। সে কেবল বলিতেছে—‘মার, মার, নয় মর!’ আমার একটা মন সেই ভূতটার সহিত মাতিয়া চলিল, একটা মন সঙ্গে-সঙ্গে কাদিতে-কাদিতে যাইতে লাগিল।

আমি পদব্রজে নদীকূলে পৌঁছিলাম। আমার পিছনে একজন লোক আসিতেছিল। বোধ হয়, আমার স্ত্রী পাঠাইয়াছিল। তাহাকে বলিলাম, ‘তুই আমার কাপড়-চোপড় গুছিয়ে

নায়কের কাহিনী

নিয়ে আয়। ভারি দরকার, এখনই কল-
কেতা যেতে হবে। আমি নদীকূলে অপেক্ষা
করছি।' আমার ছল বুঝিতে না-পারিয়া
সে ছুটিয়া চলিয়া গেল।

কূলে পৌঁছিয়া দেখিলাম, নদীও আজ
উন্মাদিনী। সে কুলিতেছে, কাঁপিতেছে,
ঘুরিয়া-ঘুরিয়া নাচিতেছে, হা-হা করিয়া
হাসিতেছে! তরঙ্গের দল মাতাল হইয়া তা'র
বুকের উপর লাকাইয়া উঠিতেছে, আছাড়
খাইয়া পড়িতেছে! আমার ভিতরের ভূতটা
বলিতেছে—'মার, মার, নয় মর!' আমি
মাঝিকে বলিলাম, 'এখন আমার ওপারে পৌঁছে
দিতে পারিস্? আমার ভারি কাজ, এখনই
যেতে হবে। একশ টাকা বখশিষ দেব।'

পুরস্কারের লোভে সে-ও আমার সঙ্গে
আগ দিতে কৃতসঙ্কল্প হইল।

সীমন্তিনী

ইচ্ছামৃত্যু মাগ্বের নাই, তাই সে তরঙ্গ-
তুফানের কবল এড়াইয়া আমি নির্বিশ্বে
কলিকাতায় পৌঁছিলাম।

কলিকাতায় পৌঁছিয়াই আমি আমার
এটর্নি-বাড়ী গেলাম এবং আমার সমস্ত বিষয়
স্ত্রীর নামে লিখিয়া দিলাম। ইহা আমার
দান নহে—দণ্ড। দুর্চারিণীর রূপ আছে,
যৌবন আছে, পাপে প্রবৃত্তি আছে। তা'র
উপর ঐশ্বর্য পাইলে মাতাল হইয়া হিতাহিত-
জ্ঞানশূন্য হইবে। বিলাসের স্রোতে ভাসিতে-
ভাসিতে অতল নরকে ডুবিবে। ইহলোকে,
পরলোকে অনন্ত নরক। ইহাই পাপীয়সীর
সমুচিত দণ্ড। একপক্ষ পরে এই উইল
আমার স্ত্রীর কাছে পাঠাইয়া দিতে উপদেশ
দিলাম।

‘মার, মার, নয় মর’!—সে ভূত এখনও

নায়কের কাহিনী

আমার উদ্বেজিত করিতেছে! সেই সময় উত্তর-পশ্চিমাঞ্চলে বিজোহানল প্রজলিত হইয়াছিল। ভূতটা বলিল,—‘চল, চল! মার, মার, নয় মর!’ এ ভূতটা যেরূপ পিছনে লাগিয়াছে, আত্মহত্যা হইতে পরি-ত্রাণ পাইবার আর অন্য উপায় নাই।

‘মার, মার, নয় মর!’—চল, যেখানে মৃত্যুর বিলাস-ভূমি! যেখানে কধিরপানো-মৃত্যু, নৃমুণ্ডমালিনী জিঘাংসা অটুশাশ্ত্রে উদ্দাম নৃত্য করিতেছে! চল, যেখানে ভীষণ আগ্নেয়াস্ত্রসকল ভৈরব-ছক্রে কালানল উদ্দীর্ণ করিয়া চারিভিতে মৃত্যু বিস্তার করিতেছে! চল, যেখানে দস্তে-দস্তে ঘর্ষণ, অস্ত্রে-অস্ত্রে ঝণাৎকাব, মুমূর্ষুর আর্ন্তস্বর, শিবারব ও গৃধিনী-চক্ষুরোলের একতান-বাদনে সংহার-নাট্যের অভিনয় হইতেছে!

সীমন্তিনী

যেখানে জীব-জননী মেদিনী সংসার-সম্প্রপ্ত
মস্তানের চির-আরামের জন্তু বিরাম-শয্যা
পাতিয়া রাখিয়াছেন ! চল, চল, ঘুমাইতে
চল !

আমি সেই রাত্রিতেই পশ্চিম রওনা হই-
লাম ও ষথাসময়ে ফতেপুরে পৌঁছলাম ।

উত্তর-পশ্চিম-প্রদেশে অনেকেই আমাকে
গাড়ী হইতে নামিতে নিষেধ করিল ; বলিল,
'এ অঞ্চলে বিদ্রোহের ভারি উপদ্রব চলি-
তেছে ।' কিন্তু আমার অন্তরের ভূতটা
বলিতে লাগিল—'মার, মার, নয় মর !'
আমি নামিয়া পড়লাম । গুড়ু-ম্-গুড়ু-ম্-গুড়ু-
দূর হইতে স্তম্ভদের আদর-আহ্বানের মত
আমার কানে পৌঁছিতে লাগিল ।

ফতেপুর-যুদ্ধের বিস্তীর্ণ বিবরণ পাঠক
সিপাহী-বিদ্রোহের ইতিহাসে দেখিবেন ।

নায়কের কাহিনী

তাহার সহিত আমার যতটুকু সম্বন্ধ, আমি তাহাই লিপিবদ্ধ করিতেছি।

বেলা প্রায় অপরাহ্ন। প্রায় সকল স্থলই রুধির-বর্দময়। কোথাও ছিন্নশির—নিবটে মস্তকবিহীন দেহ লক্ষমান—হাতের বন্দুক ধসিয়া পড়িয়াছে! আমি তুলিয়া লইলাম এবং অনেক টোটাও সংগ্রহ করিলাম। তারপর কিছুদূর অগ্রসর হইয়া দেখিলাম, একস্থানে দৃঢ়বন্ধ দশ-বারো জন সশস্ত্র ইংরাজ অটলভাবে যত্নের প্রতীকায় দাঁড়াইয়া আছে। উপযুক্ত স্থান ভাবিয়া আমি তাহাদের পশ্চাতে গিয়া দাঁড়াইলাম।

হেথা-সেথা গুলী ছুটিতেছে, মানুষ পড়িতেছে! একজন ইংরাজ আমাকে দেখিয়া বলিল, 'এখানে মরিতে আসিয়াছ কেন? পালাও, পালাও!'

সীমন্তিনী

আমি একটু হাসিয়া বলিলাম, 'কেন, সাহেব, মরণটাও তোমাদের একচেটে ব্যবসানা কি?' সে আমার মুখ দেখিয়া আর কিছু বলিল না।

একদল সিপাহীকে আমাদের দিকে ছুটিয়া আসিতে দেখিয়া আমরা গুলী চালাইতে আরম্ভ করিলাম। সিপাহীগণের সঙ্গে ইংরাজ একে-একে ধরাশায়ী হইতে লাগিল। দেখিতে-দেখিতে কে যেন ধাক্কা দিয়া আমাকে ফেলিয়া দিল।

কে আমি, কোথায় ছিলাম, কোথায় আসিয়াছি; চারিদিকে মৃত্যুর বিভীষিকাময়ী ছবি, সব ধীরে-ধীরে আমার চিত্তপট হইতে অপমৃত হইয়া গেল। কেবল মনে জাগিতে লাগিল—একখানি বিষণ্ণ-মুখ ও দুইটা নৈরাশ্র-কাতর চক্ষু।

চোরের কাহিনী

আমার নাম শুনিলে এখনই তোমরা
ঘটী-বাটি, সামলাইবে ; খিড়কীর দরজা বন্ধ
আছে কিনা, তাহার খবর লইবে, এবং কোথা
হেঁড়া কাপড়খানা শুকাইতেছে, কোন্‌খানে
ভাঙ্গা ছিঁচ্‌কেটা পড়িয়া আছে, তাহার
পুঙ্খানুপুঙ্খ অনুসন্ধান করিবে। এত করিয়াও
তবু নিশ্চিন্তি নাই। পাড়ায় কোন্‌খানে
আমার অভিসার হইয়াছে শুনিলে সে রাত্রিতে
তোমার আর ঘুম হয় না। খুট করিয়া
ইত্বর নড়িলে চম্কিয়া উঠ—ঐ রে! দৈবাৎ
যদি বাতাসে গাছ ছলিয়া তাহার ছায়াটা

সীমন্তিনী

নড়ে, তবে আর যায় কোথা? হাঁকিয়া-
ডাকিয়া লোক জড় করিয়া, লাঠি-সোঁটা
লইয়া তাড়া কর—সেই ছায়াকে! এটা
তোমাদের চিরকালে অভ্যাস। আজীবন ত
ছায়া ধরিবার চেষ্টাতেই ফিরিতেছ। বস্তুর
পিছনে তোমরা কয় জন ধাওয়া কর?

কিন্তু জিজ্ঞাসা করি, আমরা কি এতই
মন্দ? আমরা কি মানুষ নই? মারিলে
কি আমাদের লাগে না, না, কাটিলে আমা-
দের গা দিয়া হুধ পড়ে?

তোমরা একটা কথা শিখিয়া রাখিয়াছ,
পরের দ্রব্য না-বলিয়া লইলে চুরি হয়। বেশ
কথা! ঘোষালমহাশয় যখন সাহেবের অজ্ঞাত-
সারে আফিস হইতে কাগজখানি, কলমটা,
পেন্‌শিল্‌টা, ছুরিখানি তাঁহার পুত্রকে - আনিয়া
দেন, তখন কি হয়? বড়বাবু যখন নয়-সিকায়

চোরের কাহিনী

জিনিস কিনিয়া নয়-টাকা বিল করেন, তখন ?
না-বলিয়া লইলে চুরি, কাড়িয়া লইলে ডাকাতি,
কোশলে লইলে ঠকামি, এই ত তোমাদের
কথা ? আপনার বুকে হাত দিয়া কথা কও ।
এ সংসারে ঠিক সাধু কয় জন আছে ? কেহ
ডাকাতি করিয়া কাহারও রাজ্য কাড়িয়া
লইতেছে ; কেহ চুরি করিয়া, কেহ ঘুস্ লইয়া,
কেহ ফাঁকি দিয়া বিষয় করিতেছে ; কেহ
ঠকামি করিয়া বড় হইতেছে । এই সকল
লোককে তোমরা উপাসনা কর ; চিরস্মরণীয়
কবুবার জন্ম কেতার লেখ, তা'র নাম দাও
জীবন-চরিত কি ইতিহাস,—কেবল মিছে
কথার চাষ,—যা মুখস্থ না হ'লে ছেলেদের
পীড়ন কর, আর উপন্যাস পড়িলে বকো ।
জ্ঞান না যে, জানা-মিছে-কথা বরং নিরীহ,
কিন্তু যে-মিথ্যা সত্যের মুকোষ পরিয়া আসে,

সীমন্তিনী

তা কত ভয়ঙ্কর ! ষিক তোমাদের ! আম-
রাই কেবল চোরদায় ধরা পড়িয়াছি ?

কেহ মনে করিয়োনা, আমি চুরির
সাফাই গাহিতেছি। এ যে কত মন্দ কাজ
তা আমি ষত জানি, তোমরা তত জান না।
পথের প্রত্যেক বাঁকে-বাঁকে পাহারাওয়াল
দাঁড়াইয়া আছে ভাবিয়া তোমাদের কখন
গা-ছম্ছম্ করিয়াছে কি ? আঁদাড়ে-পাঁদাড়ে
মানুষের হাত হইতে আত্মরক্ষা করিবার জন্ত
সাপের দ্বায় আত্ম-সমর্পণ করিয়াছ কি ?
সর্বদা ভয়, সকলের দৃষ্টিকে সন্দেহ, মানুষ-
মাত্রকেই শত্রু মনে করিয়া কখন জীবন-যাপন
করিয়াছ কি ? পাপার্জিত অন্ন মুখে তুলিতে
গ্রাসে-গ্রাসে ধরা পড়িবার আতঙ্কে শিহরিয়াছ
কি ? চোরের মন, চোরের স্বপ্ন কেমন,
জান কি ? ধরা পড়িয়া চোরের মার কখন

চোরের কাহিনী

খাইয়াছ কি? জেল্ কিরূপ দণ্ড কল্পনা
করিতে পার? সকলের উপেক্ষিত, ঘৃণিত,
নিন্দিত, স্বজন-পরিত্যক্ত, লাঞ্চিত জীবন কখন
বহন করিয়াছ? তোমরা মনে কর, এ-সকল
অনুভব করিবার শক্তি আমাদের নাই।
সেটা তোমাদের ভ্রম। অভ্যাसे মানুষ সহিষ্ণু
হয় বটে, কিন্তু অনুভূতি একবারে লোপ পায়
না। আমরাও মানুষ। যিনি তোমাদের
সৃষ্টি করিয়াছেন, তিনিই আমাদের গড়িয়াছেন।
এক কারিকরের কারিকুরি। কাটা ফুটিলে
আমাদেরও গায় রক্ত পড়ে, ব্যথা লাগে।
আমাদেরও ক্ষুধা-তৃষ্ণা, সুখ-দুঃখ, স্নেহ-মমতা-
আছে। নহিলে আজ আমি এই দূর পশ্চিমা-
ঞ্জে আসিয়াছি কেন? স্নেহের দায়েই
আসিয়াছি। কিন্তু কথাটা গোড়াগুড়ি না-
বলিলে তোমরা বুঝিবে না।

সীমন্তিনী

আমার একটি খুড়তুত ভগ্নী আছে, বড় স্নেহশীলা, বড় কোমল-প্রকৃতি। অতি অল্প বয়সে পিতৃমাতৃহীন হ'য়ে সে আমাদের বাড়ীতে আশ্রয় লয়।

আমার পিতা বড় কৃপণ ছিলেন। ছেলেদের যে ক্ষিদে পায়, আর খাবার যে পয়সা নাহিলে আসে না, তাহা, বোধ হয়, তিনি জানিতেন না। আমি কখন-কখন তাঁহার হাত-বাক্স হইতে দু'একটা পয়সা তাঁহার অজ্ঞাতসারে লইয়া, সে-কথাটা তাঁহাকে বুঝাইতে চেষ্টা করিতাম, কিন্তু ফল ফলিত বিপরীত। পিতা আমায় নিদারুণ প্রহার করিতেন, আর দূর হইতে তাহা দেখিয়া আমার সেই খুড়তুত ভগ্নীটি ছিন্নাঞ্চলে বারবার চক্ষু মুছিত।

আমাদের বাড়ীতে কেহ আমরা পেট-

চোরের কাহিনী

ভরিয়া খাইতে পাইতাম না। ভগ্নীটী ত নয়ই।
আমি সেই অপ্রচুর অন্ন অন্নমাত্র খাইয়া
তাহাকে খাওয়াইতাম এবং আপনি চুরি
করিয়া পেট ভরাইতাম।

আমাদের বড়-বাগানে আম পাকিত।
তাহার রসান্বাদ, আমি ত আমি, দেবতারাও
কখন পাইতেন না। তঁহিঙ্গি সমস্ত সুধারস
টাকার আকার ধরিয়া বন্বান্ করিয়া
বাজিত। দেবতা না-খান্, আমি না-খাই,
ভগ্নীটীকে আম খাওয়াইবার জন্য আমার মন
বড় ব্যাকুল হইত। কিন্তু উপায় কি? বাবার
এমনি সাক্ নজর, বাগানে কোন্ গাছে কয়টা
আম পাকিয়াছে, কয়টার রং ধরিয়াছে, তিনি
ঘরে বসিয়াই বলিয়া দিতে পারিতেন। তাহার
একটী আম কা'র সাধ্য হজম করে। আমাকে
অগত্যা পরের বাগানে গতায়াত করিতে

সীমন্তিনী

হইত । যত পারিতাম, পাড়িয়া বাড়ী আনিতাম ।
তাহাতে দেখিলাম, বাবার তত আপত্তি নাই ।
আপত্তি দূরে থাক, তিনি আমার সংগৃহীত
আমগুলির যথাসাধ্য সদ্যবহার করিতেল ।
পিতা সন্তুষ্ট হইতেছেন দেখিয়া আমিও মধ্যে-
মধ্যে লাউটা, কুম্ভাটা, কলার কাঁদিটা আম-
দানী করিতে আরম্ভ করিলাম । তোমরা
মাঝে-মাঝে একটা শ্লোক আওড়াও না—
'পিতা ধর্ম পিতা স্বর্গ'—ইত্যাদি ?

এমনি করিয়া, তোমরা যাহাকে বল
রীতিমত স্বভাব-বিগ্‌ড়ান এবং আমরা বলি
ক্রমোন্নতি, আমার তাহাই হইল । ক্রমে
ধরা পড়িলাম, বেত খাইলাম, দুই-একবার
জেলও খাটিলাম ।

বেত খাইয়া যেদিন বাড়ী ফিরি, -ভগ্নীটী
আমাকে দেখিয়া মুচ্ছিত হইয়া পড়িয়াছিল ।

চোরের কাহিনী

কত সেবা করিয়া যে, সে আমার ঘা শুকাইয়া দিয়াছিল, তাহা বলিতে পারি না। জেলে তা'র জল-ভরা চোখদুটি, আর সেই কচিমুখের 'দাদা'-সম্ভাষণ কেবলই আমার মনে পড়িত।

ক্রমে আমি বাড়ী হইতে বিতাড়িত হইয়া দূরে একা বাস করিতে লাগিলাম। কিন্তু দিনান্তে একবার ভগ্নীটিকে না-দেখিয়া থাকিতে পারিতাম না, চুরি করিয়া দেখিয়া যাইতাম। আমার সমস্ত জীবনই পঙ্কিল, কেবল একস্থানে কোন্ আবিষ্কার ছিল না— আমার এই অকপট ভগ্নী-স্নেহে। পঙ্কজ যেমন পাঁকে ফুটে—পরিত্যক্ত ছিন্নবাসে, পাতের ফেলা-ভাতে ভগ্নীটি তেমনি ফুটিয়া উঠিতে লাগিল এবং একদিন একজন বড়-লোক আসিয়া পদ্মটি তুলিয়া লইয়া গেল।

আমাদের গ্রাম হইতে বহুদূর হইলেও

সৌমন্তিনী

আমার ভগ্নীর শশুরবাড়ী ও ভগ্নীপতিকে
আমি ভাল করিয়া চিনিয়া রাখিলাম।
চোরের সর্কস্ব যে তাহার কাছে গচ্ছিত।

নিত্য সন্ধ্যায় ভগ্নী ষিড়্কীর বাগানে
বসিয়া মালা গাঁথিত। ভগ্নীপতিও তথায়
উপস্থিত থাকিত। আমি এক-একদিন লুকা-
ইয়া তাহাদের দেখিয়া আসিতাম।

একদিন দেখিলাম—ভগ্নী একা বসিয়া
মালা গাঁথিতেছে, ভগ্নীপতি তথায় উপস্থিত
নাই। বোন্টীর সঙ্গে একটা কথা কহিবার,
—আর অনেকদিন শুনি নাই—তাহার মুখে
দাদা-বলা শুনিবার লোভ সাম্ভাইতে পারি-
লাম না। কিন্তু তাহার সম্মুখে উপস্থিত হইতেই
সে ভয়ে শিহরিয়া উঠিল। বলিল, 'তুমি
এখানে কেন এলে? ভাগ্যে আজ ইনি
কল্কেতায় গিয়েছেন!'

চোরের কাহিনী

সে সেই মতই জানিত । কিন্তু আমার
চোরের কান—দূরে শুষ্ক পত্রের উপর সমস্তপূর্ণ
পদশব্দ শুনিয়া চোখ চকিতে অপাঙ্গ দৃষ্টি করিল ।
নাক বলিল—‘যনিষ্যির গন্ধ পাউ’ ! দেখিলাম,
টনি মশরীর উপস্থিত । যেমন নায়কের প্রবেশ,
অমনি চোরের প্রস্থান । কিন্তু চোর জানিয়া
গেল যে, নায়ক তাহাকে দেখিয়াছেন, নহিলে,
গাছের আড়ালে অমন করিয়া ধমুকিয়া দাঁড়াই-
বেন কেন ? ভয় হইল, বুঝি কি-একটা কাণ্ড ঘটে !

ইহার দুই-তিনদিন পরেই ভগ্নীটি আমায়
ডাকিয়া পাঠাইল । ভদ্ৰু-গৃহস্থের বাড়ী সদর-
দরজা দিয়া এই আমার প্রথম প্রবেশ । আমি
অস্তঃপুরে গিয়া দেখিলাম, এই দুই-তিনদিনের
মধ্যেই তাহাকে আর চেনা যায় না, কেমন
শীর্ণ, বিক্রী, বিবর্ণ হইয়া গিয়াছে । চোখে-মুখে
কালি পড়িয়াছে ।

সীমন্তিনী

আমাকে দেখিয়াই সে কাঁদিয়া বলিল,
'দাদা, আমার সর্কনাশ হয়েছে! ইনি রাগ
ক'রে চ'লে গিয়েছেন!'

শুনিয়া রাগে, দুঃখে আমার বুকের ভিতর
ছুঁছুঁ করিয়া জলিয়া উঠিল। মনে হইল, যাক্
গে বাঁদরটা! কিন্তু মুখে বলিলাম, 'আমায়
কি করতে হবে, বল!'

'কোথায় গেলেন, কোন রকমে সন্ধান
করতে পার না?'

হরি হরি! সন্ধান! যে নিরীহ, নিরপরাধা
বালিকাকে অকারণে ব্যথা দেয়, তা'কে কেবল
সন্ধান! মূর্খ বোনটা বলিল না কেন, তোমার
কোমরে লুকান যে ছোরাখানা আছে, সেই-
খানা তা'র বুকে বসিয়ে দিয়ে এস! বোধ
করি, হিঁদুর মেয়ে তা পারে না। এরা মরে,
মারে না। মনের রাগ মনে মারিয়া বলিলাম,

চোরের কাহিনী

‘তা আর শক্ত কি ? সাত-তলার ওপর কোন্
বাক্সে টাকা-গয়না, কোথায় কি আছে, যে
সন্ধান করতে পারে, তা’র পক্ষে একটা জল-
জীৱন্ত মানুষের সন্ধান করা কী শক্ত ! কেবল
সন্ধান করব, আর কিছু না ?’

‘না ।’

না ত না ! ভগ্নী আমায় যাতায়াতের খরচ
দিতে আসিল, আমি লইলাম না । আমার
বাপ নাই, মা নাই, থাকিতেও কেহ নাই ;
আছে কেবল এই বোনটী । ইহার কাছ হইতে
টাকা ! পাড়ার পাঁচ-গৃহস্থের বাড়-বাড়ন্ত
হ’ক !—আমার টাকার ভাবনা কি ? বলিলাম,
‘টাকা দিতে হবে না । কিন্তু তুই অত ক’রে
ভাবিস নি । আমি নিশ্চয় তা’কে সন্ধান ক’রে
ধ’রে আন্ব । তুই বুঝি সে গিয়ে অব্দি কিছু
ধাস্ নি ?’

সীমন্তিনী

ঘরে টাটকাফুলের গোড়ে দিয়ে সাজান
সেই বাঁদরের একখানা ছবি ছিল, আমি
ভগ্নীকে বলিলাম, 'তুই ঐ ছবি ছুঁয়ে বল—
খাবি, তবে আমি তা'কে খুঁজতে যাব।'

কি বিপদ! বোনটা এমন প্যান্‌পেনে
জানলে আমি ও ছবির কথা তুলতুমই না। সে
ঝরঝর করিয়া কাঁদিয়া ফেলিল; বলিল—'খাব।'

তাহাকে শাস্ত করিয়া বিদায় লইলাম এবং
সেইদিনই কলিকাতায় রওনা হইলাম। পয়সা-
কড়ি হাতে কিছু ছিল না। চোরের হাতে
কখন কিছু থাকেও না, আর থাকিলেও
তাহা খরচ করিতাম না। অত নিঃস্বার্থ
পরোপকারী আমি নই। তারপর কলি-
কাতায় পৌঁছিয়া, কেমন করিয়া—নি-খরচায়
হাট্টেলে হোট্টেলে খাইয়া—সেই কুম্মান্টার
সঙ্কান ও রেলওয়ে কোম্পানিকে কৃতার্থ

চোরের কাহিনী

করিতে-করিতে উত্তর-পশ্চিমাঞ্চলে গিয়া পৌঁছলাম, সে স্বতন্ত্র কথা। এ ইতিহাসের সহিত তাহার কোন সম্পর্ক নাই। সে যখন আমার আত্ম-জীবন-চরিত লিখিব, তখন বলিব। তবে লোকহিতার্থে একটা কথা বলিয়া রাখি, এ-বাত্ম্যে আমার জ্ঞানলাভ হইয়াছিল যে, লোকে ঠকাইবার জন্ত যত উৎসুক, ঠকাইবার জন্ত তত নহে। একটু প্রলোভনের টোপ দিলেই হাসিমুখে ঠকে।

উত্তর-পশ্চিমে গিয়া পৌঁছলাম, কিন্তু ভগ্নীপতিকে সন্ধান করিয়া বাহির করা বড় দুষ্কর হইয়া উঠিল। আমি যখন আফালন করিয়াছিলাম, সাত-তলার উপরে ঘালামালের সন্ধান করিতে পারি, তখন ভাবি নাই যে, সাত-তলার টাকা-গয়না আমাদের প্রতীকায় বসিয়া থাকে, কিন্তু জীবন্ত-মাতৃষ নড়িয়া-

সীমস্তিনী

চড়িয়া বেড়ায়। ভগ্নীপতিকে ধরা একপ্রকার
অসম্ভব হইয়া উঠিল। যিনি সাধুকে বলেন
সাবধান হইতে এবং চোরকে মালামালের
সন্ধান দিয়া থাকেন; যিনি মাখন-চুরি বসন-
চুরি হইতে মন-চুরি পর্যন্ত বিচার স্নিগ্ধ,
সেই চোরের চোর, রসিক-শেখর দয়া করিয়া
সন্ধান না-দিলে আমার দ্বারা আর কার্যো-
দ্ধারের সম্ভাবনা নাই। মনে-মনে ডাকিলাম,
'হে বসন-চোর, হে মাখন-চোর, হে মন-চোর,
শুনেছি তুমি 'লুকোচুরি-বিচার অধিতীয়, দয়া
ক'রে সেই গর্দভটার সন্ধান বলিষ্ঠা দাও,
নহিলে সংসারে আমার একমাত্র বন্ধন যাহা
রাখিয়াছ, তাহাও ছিন্ন হইয়া যায়। হে চোর-
চূড়ামণি! সে মরিলে আমি বাঁচিব না।'

চোখ দিয়া ছ' চার ফোটা জলও পড়িল!
তাহাদের বিস্তর ধম্কাইলাম যে, তোরা

চোরের কাহিনী

এমন গলিয়া পড়িলে আশায় মালামালের
সন্ধান দিবে কে ? তা'রা অগত্যা থামিল।
কিন্তু ভগ্নীপতির কোনই সন্ধান হইল না।
অবশেষে মনে-মনে ভাবিলাম, যখন এতদূর
আসিয়াছি, এ সুযোগটা কি ছাড়া উচিত ?
যুদ্ধ হইতেছে, পক্ষপালের মত লোক মরি-
তেছে। যে মরিতে যায়, সে-ও কিছু রেশ
সঙ্গে রাখে। হরিনাম নয়, নগদ রেশ। কিছু
হাতাইতে পারিব না ? কিন্তু এ সাহেবী
পোষাকটা ছাড়িতে হইবে। ইহাতে ডাক-
বাংলার পিয়াদারা ঠকিয়াছে। সিপাহীরাও যদি
ঠকে ? সে-ঠকা আমার পক্ষে বড় সুবিধার
হইবে না। ষাট্-কোট্ ছাড়িয়া ধুতি-চাদর লই-
লাম। গভীর রাতে যুদ্ধক্ষেত্রে যাই, বেশ
দু'পয়সা রোজগার হয়। এমনি করিতে-করিতে
ফতেপুরে পৌছিলাম।

সীমন্তিনী

দিবসে ভারি হাঙ্গামা হইয়া গিয়াছে ।
অনেক মরিয়াছে । ঘোর রাত্রিতে মাঠে, পথে,
আমি গাঁট-পকেট হাত্‌ড়াইয়া বেড়াইতেছি ।
বিদ্রূপে কি ক্রোধে বলিতে পারি না, আমার
কীর্তি দেখিয়া মাথার উপর তারাগুলো ঝকঝক
করিয়া জ্বলিতেছে । আকাশের এক কোণে
একখানা শীর্ণ চাঁদ যেন ভয়ে-ভয়ে ঊঁকি-ঝুঁকি
মারিতেছে ! তা'র মলিন কিরণ মৃতের ম্লান
মুখের উপর পড়িয়া অতি ভয়ঙ্কর দেখাইতেছিল ।
উঃ, কী সে-সব মুখ ! কোনখানা যন্ত্রণা-বিকৃত,
কোনখানায় উপেক্ষার হস্ত, কোনখানার উপর
জিঘাংসার করাল ক্রকুটি ! আলোয়, অন্ধকারে,
নিশ্চরতায় মাঠ গম্‌গম্‌ করিতেছে । আমার
গা-ছম্‌ছম্‌ করিতে লাগিল । কি করি—ব্যবসা !
কিন্তু একরূপ অপহরণে মজা নাই । সতর্কতায়
ও কৌশলে যেখানে বোঝাপড়া, সেইখানেই

চোরের কাহিনী

ত চুরির মজা ও বাহাছুরী ! যেখানে সহস্র
বাধা-বিঘ্ন, সেইখানেই ত চুরি করিয়া তৃপ্তি ।
চোথের কাজল যে চুরি করিতে না-পারে,
তা'র চোর-বিচ্যায় দিক্ !

একজনের মুখে শুনিয়াছিলাম, কোন চোর-
পুঙ্গব প্রকাণ্ড এক ভূখণ্ড আত্মপাৎ করিয়া
বলিয়াছিলেন—‘ভেনি, ভিডি, ভিসি (veni,
vidi, vici), অর্থাৎ, এসে যেমন লক্ষ্য, অগনি
চক্ষুদান । কথাকয়টা চুরি-ডাকাতি প্রভৃতির
মহামন্ত্র—শিখিয়া লইলাম । যেখানেই যাই-
তাম, বলিতাম—‘ভেনি, ভিডি, ভিসি ।’ কিন্তু
এখানে সে মহামন্ত্রের কোন মাহাত্ম্যই নাই ।
মাহার লইতেছি, সে একেবারে নিঃসাড় । একটু
নিখাস ফেলে না, একটা হাঁ-ছ'-ও করে না ! ওঃ,
কী হিম-শীতল নিশ্চেষ্টতা ! দূর হ'ক ছাই ! কিন্তু
রাগ করিলেণকি হইবে, এ যে জাত-ব্যবসা !

সীমন্তিনী

এইরূপ ক্ষুণ্ণমনে অগ্রসর হইতে-হইতে দেখি-
লাম, একস্থানে দশ-বারো জন ইংরাজ পড়িয়া
আছে! কিন্তু এ কি! এদের কাছে এ ধুতি-
পরা মূর্তি কে? নিকটে গিয়া দেখিয়াই
আমারও নিশ্বাস নিশ্চল হইল। হুৎপিণ্ডের
স্পন্দন থামিল। এ যে আমারই ভগ্নীপতি!

অন্ধকারে আমার চক্ষু আব্ছা দেখিতে
পায়। অল্প আলো আমার পক্ষে দিন। মুখ
দেখলে বুঝতে পারি কে মটকা-মেয়ে প'ড়ে
আছে, কা'র সবেমাত্র তন্দ্রা এসেছে, কে
ঘোর নিদ্রামগ্ন। সেই অস্পষ্ট আলোকে দেখি-
য়াই বুঝিলাম, সে এখনও মরে নাই, অচেতন
হইয়া আছে। ছুটিয়া জল আনিয়া তাহার
চৈতন্য-সম্পাদন করিলাম। সে খানিকক্ষণ
আমার মুখের দিকে স্থিরদৃষ্টিতে চাহিয়া
জিজ্ঞাসা করিল, 'কে তুমি?'

চোরের কাহিনী

আমার গা কাঁপিয়া উঠিল। মনে হইল,
সে-স্বর যেন কোন্ লোকান্তর হইতে আসি-
তেছে! সে আবার প্রশ্ন করিল, 'কে তুমি?'

আমি বলিলাম, 'চোর।'

বোধ হয়, বুঝিতে পারিল না। জিজ্ঞাসা
করিল, 'চোর কে?'

আমি আর কি বলি! বলিলাম, 'তোমার
সম্বন্ধী।'

'সম্বন্ধী কে?'

'সেই যে—তোমার মনে পড়ে না?—তুমি
কল্কেতা যেতে-যেতে ফিরে এলে, বাগানে
গিয়ে দেখলে, তোমার স্ত্রীর কাছে একজন
লোক দাঁড়িয়ে আছে—সেই আমি।'

সেই অন্ধকারে তাহার ঘোলা চোখ দু'ট
যেন জ্বলিয়া উঠিল!—বলিল, 'তুমিই তবে তা'র
প্রণয়ী? তুমিই আমার বুকে ছুরি মেরেছ?'

সীমন্তিনী

এর মনে যে এমন হীন সন্দেহের উদয় হয়েছে, তা আমি বুঝতে পারি নি। আমি মনে করেছিলুম, হয় ত কোন-রকমে টের পেয়েছিল আমি চোর, তাই আমার আসাতে রাগ করেছিল। আমার বিজাতীয় রাগ হইল। সে যে মুমূর্ষু, তা ভুলিয়া গিয়া বলিলাম, 'ছুরি মারি নি, কিন্তু মাদুব'ী ছিঃ, শুনেছি, তুমি লেখাপড়া শিখেছ! তোমার আঁকল নেই? আমি চোর বটে, কিন্তু পাষণ্ড নই, বর্বর নই, তোমার মত হীন নই! 'আমাদেরও ধর্মজ্ঞান আছে। সে আমার বোন। তুমি অতি মূর্খ! তা'র মুখ দেখে বুঝতে পার নি—সে পবিত্র? তা'র চোখ দেখে বোঝ নি—সে দেবী?'

সে আমার হাত ধরিতে চেষ্টা করিল, কিন্তু অতি দুর্বল, পারিল না। আমিই স্তাহার সেই মৃত্যু-হিম হাতখানি ধরলাম। সে অতিশয়

চোরের কাহিনী

ঔৎসুক্যের সহিত প্রশ্ন করিল, 'সত্যি কথা ?
আমার সহস্বামী আছে, কখন ত শুনি নি।'

'কি ক'রে শুন্বে ? আমি চোর, আমার
সঙ্গে সহস্বামী আছে, কে স্বীকার করবে ? বাপ-মা
আমায় ছেলে কালে পরিচয় দিতে লজ্জা পান।
আমার মা তোমার স্ত্রীকে মাথার দিব্যি দিয়ে
বারণ করেছিলেন, তেঁমাকে আমার কথা না-
বলে। তুমি তা'কে কিছু জিজ্ঞাসা করেছিলে
কি ?'

লোকটা খামক? মাঝখান থেকে একটা
বেখাপ্পা কথা জিজ্ঞাসা করিয়া বসিল, 'কেন
তুমি চোর হ'লে ?'

'আরে কও কথা ! তোমার যে দেখছি
বেজায় ব্যথা ! বাঘকে জিজ্ঞাসা কর, তুমি মানুষ
খাও কেন ? গাছকে জিজ্ঞাসা কর, বেঁকে
উঠেছ কেন ? অন্ধকে জিজ্ঞাসা কর, দেখতে

সীমন্তিনী

পাও না কেন ? অত তর্ক-বিচার করবার
কি এখন আর তোমার সময় হবে ? ধর, এটা
আমার একটা রোগ। উনপঞ্চাশ বাইয়ের এক
বাই। এ রোগের চিকিৎসা করান উচিত।’

রক্ত-মোক্শে তখন তা’র মস্তিষ্ক অতিশয়
দুর্বল, কি বলেছে, নিজেরই বুঝতে পারছে না।
মরতে চলেছে, আর আমায় উপদেশ দিচ্ছে,
‘ছি, চুরি করা কি ভাল !’

‘ও-সব শিশুবোধের নীতিকথা।—ভালমন্দ
জানি নি, বুঝি নি। তবে কাজটা যে সুবিধের
নয়, আজকে তা হাড়ে-হাড়ে বুঝিছি।’

‘কেন ?’

আবার বলে—কেন ! ‘কেন ? আমরণ
সংসারের সঙ্গে লুকোচুরি খেলা ! কেন ? সে
ভগ্নী, তুমি ভগ্নীপতি, তোমাকে আমৃত্যে দেখে
পালাতে হ’ল ! তা’তেই ত এ বিষ উঠল।

চোরের কাহিনী

সংসারে সেই বোনটি আমার একটীমাত্র স্নেহের ধন, এই লুকোচুরি খেলে তা'রই বুকে ছুরি দিলুম! আবার জিজ্ঞাসা করুছ—কেন? ছুরি আর করব না। এই দেখ, মড়ার গাঁট-পকেট থেকে ছুরি ক'রে যা কিছু নিয়েছি, সব ফেলে দিচ্ছি। ছুরি আর করব না।'

'তবে কি করবে?'

লোকটা মৃত্যু-মৃত্যুতেও জ্বালালে! কিন্তু বড় মিছে বলে নি। সত্যই ত! আজীবনের অবলম্বন যখন ছাড়তে হলে, তখন কি করব? কিন্তু এখানে ব'সে—চারিদিকে মৃত, মুমূর্ষুর সঙ্গে কথা কইতে-কইতে কি ঠিক করব, কি উত্তর দেব? এই যে এখানে যারা প'ড়ে রয়েছে, তা'র মধ্যে কত লোক যে হ্যান্-করব, ত্যান্-করব, কত কি করব বলেছিল! এখন সব কি করছে? ভগ্নীপতিকে বললুম, 'সে যা

সৌমন্তিনী

হয়, পরে ঠিক করা যাবে। দেশ-হিতৈষী হব, কি নিঃস্বার্থ পরোপকার ব্রত গ্রহণ করব, তা কি এখানে ব'সে ঠিক করা যায়? সে এখনকার কথা নয়। এখন তুমি চলেছ, বুঝছি; বুঝেছি, সেও যাবে; আর বুঝছি, তোমাদের দু'জনকে আমিই মার্বলুম! বাঃ বাঃ! চোঞ্চ হয়ে কেমন মজা কর্বলুম, দেখেছ? ভদ্রলোকের এ কাজ নয়। যাদের দয়া-মাধা আছে, স্নেহ-মমতা আছে, তাদের এ কাজ নয়। চুরি আর কর্ব না। মোট বইতে হয়—ও-বি আচ্ছা!

হাসি-ঠাট্টা ক'রে ব্যাপারটাকে উড়িয়ে দেব মনে করেছিলুম, কিন্তু চোঞ্চট'ট মানা মানলে না। বোধ করি, আমার সেই দর-বিগলিত ধারা দেখে আমার কথায় তা'র প্রত্যয় হ'ল। বললে—'তোমার কথা সত্য,'—ব'লে, ফোস

চোরের কাহিনী

ক'রে এমনি একটা নিশ্বাস ফেললে যে, আমার ভয় হ'ল, সব বুঝি ফুরাল । কিন্তু না, দেখি, সে আমার মুখপানে চেয়ে রয়েছে । আমি বললুম, 'সত্য, সত্য, সত্য ! তোমার মৃত্যু নিকট, তোমার কাছে এখন মিথ্যা ব'লে আমার কোন লাভ নেই । তুমি তা'র স্বামী ; বরং তুমি একটু শান্তিতে মর, সেইটাই আমার ইচ্ছা । তুমি মৃত্যুকালে জেনেছ—সে সত্যী,—সেটা শ্রুতে পেলে তা'র জীবনভার অনেক লাঘব হবে ।'

'সে সত্যী, সত্যী, সত্যী । তুমি গিয়ে তা'কে বোলো । বোলো, আমি অতি পাষণ্ড । বোলো, জীবনে একবার তা'কে ভাল বুঝে-ছিলুম—সে ভুলের প্রায়শ্চিত্ত প্রাণ দিয়ে করছি । আর বোলো, আসবার সময় তা'র যে বিষণ্ণমুখ, নৈরাশ্র-কাতর চোখ দু'টা দেখে'

সীমন্তিনী

এসেছি, সেই ছবি বুকে ক'রে চল্লুম। ভাই,
তুমি চোর হও আর যা-ই হও, তুমি তা'র
ভাই। আগে যদি পরিচয় পেতুম, আদর
ক'রে নিতুম। কেন, ভাই, আগে পরিচয়
দাও নি? হায়, হায়, হায়! অভাগিনীর
কেউ রইল না, তুমি তা'কে দেখো !'

এই কথায় আমার মনে হ'ল, তা'র
মনে আর কোন সন্দেহ নাই। আর সে কথা
কহিল না। আমার বোধ হয়, সত্যই সে
তা'র ধ্যান-মগ্ন হ'ল !

ক্রমে ভগ্নীপতির অবস্থা আরও হীন
হইয়া আসিল। 'অস্তে গঙ্গা নারায়ণ ব্রহ্ম !'—
আমি জিজ্ঞাসা করিলাম, 'তুমি ঠাকুর-দেবতা
মানো ?'

সে বলিল, 'মানি।—সেই আমার ইষ্ট-
'দেবী।'—ইহাই তাহার শেষ কথা।

চোরের কাহিনী

ভগ্নীপতির পকেটে কিছু টাকা ছিল।
সেই টাকায় তাহার সংকার করাইলাম।
মানবের এই শেষ—মুষ্টিমেয় ছাই! ঘৃণা-
হিংসা, পাপ-তাপ, আশা-তৃষ্ণা, স্নেহ-ভাল-
বাসার সমষ্টি এই জীবন—নিদর্শন তা'র এক
মুঠা পাশ! সব ফুরাইল!

ফুরাইলু কি? এখনও যে ভগ্নীটির
বুকে বজ্রাঘাত করিতে হইবে। সে কাজ যে
আমার!—তাহাকে যে খুন্ করিতে বাকি!

বিধবার কাহিনী

দিন যায়, থাকে না। কারুর হাসির
লহরে, কারুর রোদন-ধারায় দিন যায়, থাকে
না। যেদিন ষোড়শবর্ষ বয়সে আমার কপাল
অন্ধকার ক'রে সিন্দূর-শিখা চিরদিনের জন্ম
নিবে গেল, তারপর একুশ বৎসর অতীত
হ'য়ে গিয়েছে। কিন্তু এই একুশ বৎসরের
ইতিহাস, আমার জীবনের একদিনের ইতিহাস।

লোকে আমাকে দেখে বলে, এত বয়েস
হয়েছে, তবু যেন মনে হয়—বালিকা। তা'রা
ত জানে না যে, আমার কেবল বয়সই
বেড়েছে, আমি ত আর বাড়িনি মনের
বয়স বাড়ে ঘটনায়। লোকে বলে, কত

বিধবার কাহিনী

দেখলুম, কত শুনলুম ! আমার যে একদিনে
সব দেখা-শোনা শেষ হ'য়ে গিয়েছে !

সেই ত সংসার রঙ্গমঞ্চ—নিত্য কত
অভিনয় হচ্ছে ! অঙ্কের পর অঙ্ক—কত রঙ্গ,
কত রঙ্গ, কত সাজ ! আমি কেবল চেয়ে-
চেয়ে দেখি । শিশু যেমন সংসারে এসে
কাউকে চেনে না, জানে না, বুঝে না ; কারুর
সঙ্গে, কিছুর সঙ্গে আপনাকে যিশ খাওয়াতে
পারে না, আমিও তেমনি কেবল চেয়ে-চেয়ে
দেখি । কিন্তু শিশুরও হাসি-কান্না আছে,
আমার তা'ও নাই । আমার হৃদয় শুকিয়ে
গিয়েছে । কোন রসেই আর রসে না ।
সেখানে অশ্রুর তরঙ্গও নাই ।

ফতেপুর থেকে ফিরে এসে প্রথম-প্রথম
দাদা নিত্য আমাকে কাঁদাবার চেষ্টা করত ।
তার শেষ কথাগুলি বারবার কত রঙ্গ ক'রে

সীমন্তিনী

বলত। সে নিজেকে কাঁদত আর আমায়
বলত, 'পোড়ারমুখি, তুই কাঁদ, কাঁদ, নইলে
পাগল হবি, ম'রে যাবি।' আমার চোখে
যে জল নাই, দাদা! এখন আর সে সে-
চেষ্টা করে না।

এক-রকম পদার্থ আছে, জলতে-জলতে
ছুটতে থাকে। • তাঁ'র সংস্পর্শে যা-কিছু
আসে, তা'তেও আগুন ধরে। আমি সেই
উষ্ণাক্রপিনী। পিতৃগৃহে পুড়িয়েছি। তারপর
স্বামি-গৃহে আগুন ধরিয়ে জলতে-জলতে
চলেছি। আর কত জলব, কত চলব ?
ভগবান্, এ বারিহীন মকর কি শেষ নাই ?
এ জ্বালাও অনন্ত নাই ? হায়, বসুন্ধরা,
বিষধরের ফণায় বাস কর, তাই বুঝি, তোমার
এত জ্বালা ! আমার এ অনন্ত দাঁই কেন ?
কি পাপে ?

বিধবার কাহিনী

আমার দু'দিনের খেলাঘর একদিনে ভেঙে গেল, কি পাপে ? পনেরবছর বয়সে এমন কি পাপ করেছিলুম যে, তুমানল তা'র প্রায়শ্চিত্ত ? আমার সে ক্ষুদ্র খেলাঘরটা তোমার অনন্ত স্থানের কতটুকু ছোড়া ক'রে ছিল ? সেটিকে ভেঙে তোমার কী কাজ সিদ্ধ হ'ল, প্রভু ? আমার সিঁথের সিঁদুরটুকু মুছে নিয়ে তুমি কা'র কপালে রাজটীকা পরালে ? আমার হাতের লোহাটুকু কেড়ে নিয়ে তোমার কেনি ব্রহ্মাণ্ডের শৃঙ্খল গড়ালে ? এ ক্ষুদ্র ত্বণের উপর বজ্রাঘাত ক'রে তোমার কী পৌকষ বাড়ালে ? শুনেছি, তুমি সর্বজ্ঞ, অন্তর্ধামী ! অন্ধকার ধরণীগর্ভে কোথায় কি কীটাণু আছে, তুমি দেখ ; পিপীলিকার পদশব্দ শুনতে পাও ! কেবল আমারই হৃদয়ের মুক বেদনা তুমি দেখতে

সীমন্তিনী

পাও না ? আমার বুক-চাপা কাগা তোমার
কানে উঠে না ? সব দেখ, সব শোন, কেবল
আমারই বেলা পাথর হ'য়ে ব'সে আছি !

দিন ছিল—যখন প্রত্যেক দিনটীকে
সৌভাগ্যের মত, দেবতার আশীর্বাদের মত,
বরণ ক'রে নিতুম। নারীজীবন পেয়েছি
ব'লে আপনাকে ধন্য ধনে করতুম। প্রভাতে
স্বামীর পদধূলি লয়ে উঠতুম, আনন্দে আমার
হৃদয় তরতরু ক'রে কাঁপত। ইচ্ছা হ'ত,
ঐ পাপিয়ার মত আকাশ ছেয়ে গান গেয়ে
বেড়াই। সেই পাখী এখনও গায়, সেই
মল্লিকা এখনও ফোটে, সেই ত বাতাস এখনও
বয়, কিন্তু তখন ত গায় এমন বিষ ছড়াত না !

এখন দিনগুলিকে নিয়তির অভিশাপ
ব'লে মনে করি। সূর্য উঠতে দেখলে
শয় হয়। মনে হয়, আবার সেই সংসার,

বিধবার কাহিনী

সেই নীরস নিত্য-কর্মভার। সেই সব
জঞ্জালের রাশি, সেই দৈতো-হাসি নিয়ে দিন
কাটাতে হবে। সেই অরুচির আহার, অনিদ্রার
শয়ন, লোকের সঙ্গে মিছি-মিছি আলাপ।

আমার প্রথম যখন এই দশা হ'ল, তখন
প্রতিবাসিনীরা এসে কত সাহায্য দিত, সমবেদনা
জানাত। তাদের দেখলে অর্ধিষ ছুটে পালাতুম।
মাসীমা আমায় ধ'রে-ধ'রে—এনে তাদের কাছে
বসাতেন। আমার জন্ম তা'রা কাঁদত, কিন্তু
আমার পোড়া-চোখে জল ছিল না।
খানিক হা-ছতাপ ক'রে তা'রা বিরক্ত হ'য়ে উঠে
যেত, আমি বাঁচতুম। ক্রমে পাড়ায় রব উঠল,
আমি পাষণ। বলতে পারিনি—শুনেছি,
পাথর তাতে ফাটে, মাটি ধুল হয়; জমাট-বাধা
বরফ গ'লে জল হ'য়ে যায়; কেবল রক্ত-
মাংসের পিণ্ড নারীর শরীরেই এত সয়!

সীমন্তিনী

ক্রমে দিন যেতে লাগল। বছরের পর বছর ফিরল। এমনি ক'রে পাঁচবছর কাটল, আমার কোন পরিবর্তন হ'ল না। আমার অবস্থা দেখে মাসীমা ভয় পেলেন, দাদা ভয় পেলেন। মাসীমা বললেন, 'বৌমা, বাড়ীতে পুরাণ-পাঠ হ'ক, শুন্লে তোমার মন একটু ঠাণ্ডা হবে।' দাদা বললে, 'একটা অতিথ-শালা কর। একটা-কিছু নিয়ে ত থাকতে হবে।' পোড়াকপাল! নাই বা থাকলুম, দাদা! থাকতে কে চায়? "

হায়, এই কি আমার ভাগবত-পুরাণ শোন্বার বয়েস, না, অতিথ-ফকিরের সেবা করবার বয়েস? আমার যে এখন স্থখের সংসার পাত্‌বার সময়। আমি কি এখন ও-সব নিয়ে সময় নষ্ট করতে পারি? আমার যে এখন স্বামি-সেবা করবার সময়, সন্তান-পালন

বিধবার কাহিনী

করবার সময়। সে অপ্রাপ্ত দুর্ভাগ্যের জন্ত
যে, আমার মাতৃহৃদয় বেদনায় টন্টন্ করছে।
সে অশ্রুত মাতৃ-সস্তাষণের জন্ত যে, আমার
মায়ের প্রাণ উপসী। আমি কি এখন ভাগবত-
পুরাণ নিয়ে থাকতে পারি? আমার কি নিয়ে-
থাকবার মত জিনিস কিছু নাই?

আমার স্বামী আছেন। তোমরা তাঁকে
দেখতে পাও না, কিন্তু আমার মনের ভিতর
তিনি আছেন। একটা চাঁদপানা খোকা আছে।
বড় দুঃখ রইল, আমার সে সোনার যাদুকে
কাউকে দেখাতে পারলুম না। দেখাতে পারলুম
না, আমি মনে-মনে গ'ড়ে তা'কে কেমনটী
করেছি। কিন্তু সে আর বেশী বড় হ'ল না।
তা এই ছোট বয়েসেই সে যে দুর্ভাগ্য হয়েছে!
এখনও ভাল ক'রে চলতে শেখেনি; তবু,
হেলতে-দুলতে এসে, ফুলের কুঁড়ির মত ক'টা

সীমন্তিনী

খুদে-খুদে দাঁত বা'র ক'রে হেসে-হেসে, কখন
আমার আঁচল, কখন হাঁটু জড়িয়ে ধরে । ছপুর-
বেলা আমি যখন আমার পিণ্ডি বাঁধতে বসি,
সে এসে আমার পিঠের ওপর পড়ে । দিন-রাত
উৎপাত—কখন এটা ভাঙে, ওটা ফেলে দেয় ।
আমি তা'কে বুকে এঁটে ধ'রে, তা'র বাপের
কাছে নিয়ে যাই; বলি—‘হাঁগা, ছেলে এমন
দুরন্ত হ'ল, আমায় যে একদণ্ড তিষ্ঠতে দেয়
না, তুমি একটু বকবে না?’ তিনি কেবল
হাসেন ! সে-হাসি আমি বিভোর হ'য়ে দেখি !
অমনি দাদা এসে বলে, ‘তুই অমনি ক'রে
ছবির দিকে চেয়ে দাঁড়িয়ে থাক, আর ভাত
চুঁইয়ে থাক ।’ দাদা, এমনি করেই কি সাধের
ছবি ভেঙে দিতে হয় ! হায়, এত ক'রে
আঁকলুম ! দু'দণ্ড তাঁর সঙ্গে নিরিবিলি ব'সে
যে দু'ট ক'থা কইব, সব দিন সে সময়ও

বিধবার কাহিনী

পাই নি।' হয় ত সিধু-ঝি এসে বললে, 'মা, আমার একজন কুটুম্ব এসেছে, তা'র সিধে বা'রু ক'রে দাও।' অমনি যেতে হ'ল। কি করি, যার সংসার, আমি যে তাঁর দাসী !

এমনি ক'রে আরও কয়েক বৎসর কেটে গেল। ক্রমে মাসীমাও আশ্রয় ছেড়ে চ'লে গেলেন। আমি এই নিবান্দ-পুরীতে একলা কেমন ক'রে যে দিন কাটাব, সে কথা কেউ ভাবে না। কেউই দেখছি, আমার মুখ চায় না ! বাবা গেলেন, মী গেলেন ; ইনি পাঘ ঠেললেন ; মাসীমাও চ'লে গেলেন ; আবার খোকাও বলছে—'মা, আমি খেলতে যাব।' 'আমি কি নিয়ে থাকব, বাবা !' সে বললে, 'কেন ? তুমি যখনই মনে করবে, আশ্রয় দেখতে পাবে, আমার কথা শুনতে পাবে।'

সত্য, সে ত মিথ্যা বলেনি ! যখনই কেউ

সীমন্তিনী

এসে অন্ন চায়, আমার মনে হয়, ঐ যে আমার
খোকর ক্ষিধে পেয়েছে! কেউ এসে বস্ত্র চায়,
অমনি মনে হয়, আমারই থোকা কাপড়
চাচ্ছে! ছুটে গিয়ে দেখি—এ ত আমার সে-ই!
আমার সোনার যাদু, মাণিক আমার, আমার
বুক-জুড়ন, নাড়ী-ছেঁড়া ধন! তুমি চির-
জীবী হ'য়ে আমার কোল জোড়া ক'রে থাক।
আমি বড় দুঃখিনী! আমার কেউ নেই, বাবা,
কেউ নেই, আমি বড় অভাগিনী! আমার
এ বিষয় কা'র জ্ঞান? সবই ত আমার বংশের
দুলাল ভোগ করবে বলে? অতিথ-শালা
কর, দাদা!

অতিথ-শালা প্রস্তুত হ'ল—আমাদের
খিড়কীর বাগানের পিছনে। সেখানে নিত্য
অতিথি খায়, আর সময়-সময় সাধু-সন্ন্যাসী এসে
থাকেন। এই অতিথি-শালায় একটা ঘরের মতন

বিধবার কাহিনী

আছে। কখনকখন ভাল সাধু-সন্ন্যাসী এলে
সেইখানে বসে তাঁদের কাছে ধর্মকথা শুনি।
সবারই ঐ এক কথা! জপ-তপ, সাধন-ভজন
কর, ভগবান্কে ডাকো! তাঁদের ভগবান্ কে?
তাঁকে ত আমি চিনি নি। আমার যে একজন
প্রত্যক্ষ দেবতা আছেন—আমার হৃদয়-মন্দিরে
প্রতিষ্ঠিত!। তাঁকে আমি নিত্য ফুল পরাই,
চন্দন মাখাই, আমার মনের কথা বলি। তাঁকে
বৈ অন্য দেবতাকে ডাকতে আমার ভালই
লাগে না, তা সাধু-সন্ন্যাসীর কথা শুন্ব কি?
কিন্তু তবু যাই। তাঁরা যখন ভজন গান করেন,
বড় মিষ্টি লাগে। মনে হয়, এ ত আমারই
ইষ্ট-দেবতার স্তব।

দিনেরবেলা একরকমে কেটে যায়।
রাত্রিতে এ শূণ্যপুরী বড়ই ভয়ঙ্কর মনে হয়।
এ বাড়ী লোকজনে পরিপূর্ণ, কিন্তু তবু শূণ্য!

সীমন্তিনী

যখন তিনি ছিলেন, একলাই সব পূর্ণ ক'রে থাকতেন। একের অভাবে সমস্ত বাড়ী ঘেন খাঁ-খাঁ করছে !

তাঁর সে-শয়নকক্ষ আমি দিনেরবেলা ঝাড়ি-ঝুড়ি, পরিষ্কার করি। রাত্ৰিতে সে-ঘরে যেতে পারি না। মনে করেছি, যখন আমার জীবনে মহারাত্ৰির উদয় হবে, তখন সেই ঘরে গিয়ে ঘুমুব। সে-ঘর যে আমার পরমতীর্থ, সেখানে ম'লে আমি সেই তীর্থেশ্বরকে পাব। রাত্ৰিতে হয় তাই ছাদে প'ড়ে কাটাই, নয়, আমাদের খিড়কীর বাগানে গিয়ে একলাটী চুপক'রে ব'সে থাকি। সেখানে সাদা-কালো-পাথরের বাঁধান একটা বেদী আছে। তা'র চারিদিকে মল্লিকা, বেল, যুঁই, টগর, কঁদুফুলের ঝাড়—ফুলে ভ'রে রয়েছে। তাঁদের হাসি দেখলে আমার তাঁর হাসি মনে পড়ে। ফুলগুলি

বিধবার কাহিনী

স্পর্শ করলে আমি তাঁর স্নিগ্ধ স্পর্শ-স্বথ অনুভব করি।

আজ সেইদিন। আমার বেশ মনে পড়ছে, সে কোন্ যুগে একটা স্বপ্ন দেখেছিলুম। আমি ক'নে-চন্দন, চেলী প'রে, কুম্ভমহারে সজ্জিত হ'য়ে, একখানি পীড়ির উপর ব'সে আছি। এক রাজপুত্রুর গিয়ে আমার হাত ধ'রে এই বাড়ীতে নিয়ে এলেন। তারপর তিনি কোথায় চ'লে গেলেন, আর এলেন না। আমি কিন্তু সেইদিন হ'তে তাঁর প্রতীক্ষায় ব'সে আছি।

মাথার উপরে কালো আকাশ—তা'তে কত নক্ষত্র! আমার মনে হয়, তা'রা যেন সব কতকাল ধ'রে আমার পানে অবাক হ'য়ে চেয়ে আছে! আকাশ নীরব, রাত্রি নিস্তর, বাতাস নিথর, বৃক্ষসব নিষ্পন্দ! যেন সব স্বপ্ন! কেবল আমি সত্য! কত যুগ-যুগান্তর ব'সে-

সীমন্তিনী

ব'সে এই স্বপ্নই দেখছি। কত ভাঙছে, কত গড়ছে, কত আসছে, কত যাচ্ছে!—আমি কিন্তু নিয়তির নির্দিষ্ট মূর্তির মত, চিত্রিত দুঃস্বপ্নের মত, চিরকাল এমনি ব'সে আছি। বৃকের ভিতর কেমন ক'রে ওঠে! মুছে দাও, প্রভু! যেমন ক'রে আমার সিংখের সিঁদূর মুছেছ, তেমনি ক'রে আমাকেও মুছে দাও!

আজও আমার চারদিকে তেমনি ফুল ফুটেছে, সেদিন যেমন ফুটেছিল। আমার কেবলই মনে হচ্ছে, আমায় একলা ফেলে সে স্বপ্নের রাজপুত্র গেল কোথায়! যাবার সময় ব'লে গিয়েছিল, 'সাবিত্রী যমালয় থেকে সত্যবান্কে ফিরিয়ে এনেছিলেন; যে পারে, তা'র করে।' কৈ, ফেরাতে ত পারলুম না! হায়, আমি যে মনে করেছিলুম, তাঁর পায় কাঁটাটা ফুটতে দেব না।

বিধবার কাহিনী

ঐ দিগন্তের আঁধারে যেমন একটীর পর আর একটা নক্ষত্র ফুটছে, আজ আমারও মনের অন্ধকারে তেমনি একটা-একটা ক'রে স্মৃতি উঠছে! পথে আসতে-আসতে রাজপুলের সেই প্রথম-সস্তাষণ—‘তুমি স্বর্গের ইন্দ্রাণী, না, মর্তের ফুলশাণী!’” এই বেদীর উপর ব'সে, আমার মুখের পাশে চেয়ে, সেই গান— ‘জনম্-জনম্ হাম্ রূপ নেহারিষু, নয়ন না তিরপিত ভেল!’

এ কি! স্বপ্নের রাজপুত্রুর ফিরে এল নাকি? না—আকাশ, বাতাস, নক্ষত্র, বৃক্ষপত্র সহসা মুখর হয়ে উঠে গাইছে—‘জনম্-জনম্ হাম্ রূপ নেহারিষু—?’

এ-কি আমারই অন্তরের সুর বাইরে ধ্বনিত হচ্ছে? আমি কি পাগল হব? এ গান ত অনেকবার অনেকের মুখে শুনেছি। কিন্তু

সীমন্তিনী

ঐ স্বর, ঐ সুর যে, ফতেপুরের মাঠে চির-নীরব
হ'য়ে গেছে! স্বর্গ হ'তে কি এ সুধার ধারা
ব'য়ে আসছে? এ-কি অশরীরীর গান, না,
স্বপ্নের রাজপুত্রুর সত্য-সত্যই ফিরে এল? এ
দিকে কে আসছে!

আমি ভয়শূন্য। দেহীর চরম ভয় যত্ন,
আমি তা'র প্রতীক্ষায় আছি। কিন্তু তবু আমার
বুকের ভিতর কাঁপতে লাগল। আমি ভয়ে-
ভয়ে আগন্তুককে দেখতে লাগলুম। অম্পষ্ট
নক্ষত্রালোকে তাঁর চেহারা ভাল দেখা গেল না।

কিন্তু তিনি, বোধ করি, আমাকে
দেখতে পেয়েছিলেন। তাঁর স্বর সহসা থেমে
গেল। আমি জিজ্ঞাসা করলুম, 'কে
আপনি?'

'আমি সন্ন্যাসী। তুমি কে? স্বর্গের
ইন্দ্রাণী, না, মর্ত্যের ফুলস্নানী?'

বিধবার কাহিনী

একে সেই স্বর, সেই সুর, সেই গান,
তা'র উপর আবার প্রথম-মিলনের সেই প্রথম-
সম্ভাষণ ! আমাতে যদি মূর্ছা-ধাবার মত
কিছু উপকরণ অবশিষ্ট থাকত ত সংজ্ঞা হারা-
তুম। দু'হাতে জোর ক'রে বুক চেপে ধ'রে
বল্লুম—'স্থির হও, স্থির হও, দাদা যে স্বহস্তে
তোর সংকার ক'রে এসেছে !'

আমার গা বিম্বিম্বিত্ব করতে লাগল।
আকাশের সমস্ত তারা, পৃথিবীর সব দৃশ্য
যেন সহসা নিবে গেল ! কিন্তু সে মুহূর্তের
জন্য। ভাবলুম, এ অতিথি যদি সত্যই
লোকান্তর হ'তে এসে থাকেন, সে ত প্রার্থ-
নীয়। আজ একুশ বৎসর ধ'রে যার পূজা
করছি, তিনি যদি সদয় হ'য়ে দেখা দেন, তা'র
চেয়ে আর আমার সৌভাগ্য কি আছে ?

পঁয়তাল্লিশ সকালে খবর পেলুম, সন্ন্যাসী

সীমন্তিনী

অতিথিশালায় আছেন। দাদা এসে বললে,
'একজন নূতন সন্ন্যাসী এসেছেন।'

'কোথা থেকে?'

'ফতেপুর থেকে।'

আমার অন্তরাগ্না শিউরে উঠল!
চকিতে দাদার মুখের পানে চেয়ে দেখলুম,
আমার দৃষ্টির ব্যাকুলতা দেখে সে কি বুঝলে,
বলতে পারি না। আমি যে সন্ন্যাসীকে
রাত্রিতে দেখেছি, সে ত জানে না। কিন্তু
তা'র চোখ যেখে আমি বুঝলুম, তা'র দৃষ্টির
আড়ালে কি যেন লুকানো রয়েছে। আমিও
যে ভ্রমে পড়েছি, দাদাও সেই ভ্রমে
পড়েছে।

দাদা বললে, 'সন্ন্যাসীকে দেখে পাগ্লা-
মীর মত অনেক কথা আমার মনে উঠতে
লাগল। তাঁকে ভিজ্ঞাসা করলুম, আপনি এখন

বিধবার কাহিনী

কোথা থেকে আসছেন ? সন্ন্যাসী বললেন,
আপাততঃ ফতেপুর থেকে ।’

আজ ক’দিন হ’ল, সন্ন্যাসী অতিথিশালায়
আছেন । ঠিক একরকম মাহুস কি ছ’জন
হয় ? আমি নিত্য সন্ন্যাসীকে দেখি । নিত্য
তাঁর মুখে ধর্মকথা শুনি । একদিন প্রশ্ন
করলুম, ‘স্বীলোকের ধর্ম কি ?’

‘স্বীলোকের স্বামি-সেবাই ধর্ম ।’

‘যদি বিধবা হয় ?’

‘মৃত-স্বামী কি স্বামী নয় ?’

‘সন্ন্যাসি, মৃত-স্বামীকে ইষ্টরূপে পূজা
করলে তিনি কি সদয় হ’ন ?’

‘ভক্ত নিজের হাতে মাটি দিয়ে শিব গড়ে,
প্রেম-ভক্তিভরে তাঁর পূজা করে ; তারপর
সেই নিজের হাতে-গড়া মাটির শিবের কাছে
মুক্তি চায়, মুক্তি পায় । প্রেমে পুষাণ প্রাণ

সীমন্তিনী

পায়, মৃত্তিকা সচেতন হয়, দারু কথা কয় !
প্রেম—মৃত্যুঞ্জয় !

‘মৃত-পতির কি দেখা পাওয়া যায় ? তিনি
ফিরে আসেন ?’

‘সাবিত্রী যমালয় থেকে সত্যবান্কে
ফিরিয়ে এনেছিলেন । যে পারে, তা’র ফেরে ।’

সেই কথা ! যে-কথা ব’লে তিনি আমার
কাছ থেকে জন্মের মত বিদায় নিয়েছিলেন !
—সেই কথা !

কে এ, কে এ সন্ন্যাসী ? এর কণ্ঠস্বর
শুনলে কেন আমার আর একটি কণ্ঠস্বর মনে
পড়ে ? এর চাউনীতে কেন আর একজনের
নয়ন-ভঙ্গী দেখতে পাই ? এর হাসিতে কেন
আর এক হাসির জ্যোৎস্না খেলে ? - এই
প্রিয়দর্শন, সুঠাম, নবীন সন্ন্যাসীকে দেখে
কেন আমার আর একটি তরুণ, শ্যাম-সুন্দর

বিধবার কাহিনী

মৃত্তি মনে হয় ? কে এ ? কে এ সন্ন্যাসী ?
আজ একে দেখে মরা-নদীতে আবার জোয়ার
আসে কেন ? এর দৃষ্টিতে যেন আমার
চারিদিকে রাশি-রাশি ফুল ফুটে ওঠে !
বুকের ভিতর সাধের সাগর তোলপাড়
করতে থাকে । - একে দেখবার জন্ম, এর
কথা শোনবার জন্ম, কেন, আমার চক্ষু-কর্ণ
নিয়ত ভ্রমিত হ'য়ে থাকে ? আমার যৌবন
বিগত, মন আশাহত, প্রাণ মৃত, হৃদয় রসহীন,
তবু এতদিন পরে কেন এ শুষ্ক তরু মুঞ্জরিত
হয় ? ইচ্ছা হয়, এই সন্ন্যাসীর পায় ধ'রে
বলি, ওগো, তুমি আমায় কলকিনী ব'লে
পায় ঠেলে গিয়েছিলে, আমি যে আমার
একশবছরের তৃষ্ণা নিয়ে তোমারই প্রতীকায়
ব'সে আছি । একি সেই ! সত্যই সেই ?
মৃত কি ফিরে আসে ?

সীমন্তিনী

দাদা একদিন আমায় জিজ্ঞাসা করলে,
'এ সম্যাসীকে তোর কি মনে হয় ?'

আমি মনে-মনে বললুম—আমার ষম !

সত্যই আমার ষম ! আমার দু'দিকে
দুই সাগর উথলে উঠছে, তাঁ'র মাঝখানে আমি
অবলা—তুণের বাঁধ—কতক্ষণ স্থির থাকুব ?
আমার একদিকে সন্দেহ, একদিকে আকর্ষণ ;
একদিকে স্বর্গ, একদিকে নরক ; একদিকে
তৃষ্ণা, একদিকে অমৃত ; আমি কতক্ষণ স্থির
থাকুব ? আমার একদিকে অবসাদ, একদিকে
উচ্ছ্বাস ; একদিকে স্বপ্ন, একদিকে জাগরণ ;
একদিকে জীবন, একদিকে মৃত্যু—তরঙ্গের
পর তরঙ্গ বুক ভেঙে দিবে যাচ্ছে—এ তরঙ্গের
সংঘর্ষে আমি কতক্ষণ টিকুব ? তুলিয়ে যাব,
তুলিয়ে যাব ! হে ঠাকুর ! হে আমার
অন্তরের দেবতা ! ইহ-পরকালের সহায়,

বিধবার কাহিনী

এ আবার তোমার কি ছলনা ? কি পরীক্ষা ?
একবার কলঙ্কিনী ভেবেছিলে, সেই পরীক্ষা
আজ একুশ বৎসর ধ'রে দিচ্ছি । আবার এ-কি
ছলনা ? আমার প্রাণ বলছে—এই তুমি—
ছুটে চল ! মন বলছে—ধর্ম—ছ'স্নি ! এক-
জন টান্ছে, একজন পায় বেড়ী দিচ্ছে ! আমি
অবলা, কত সহিব ? মুখই আমার বল,
তুমিই আমার বল ।

মা গো, আজ অনেক দিনের পর
তোমায় মনে পড়্ছে । তুমি আগুনে পুড়ে
যন্ত্রণা এড়িয়েছ, আমি পুড়ছি, পুড়ছি ! সেই-
যে মা, ফেলে চ'লে গিয়েছিল, আর কি কোলে
নিবিনি ? একবার, মা, আর একবার
আমায় দেখা দে, কোলে নে, আমি তোমার
কোলে জুড়ুই ! মা গো, এই যে শয্যা
নিলাম, এই শয়ন ঘেন আমার শেষ শয়ন হয় !

সীমন্তিনী

মা, তুমি সত্যী ! আমি যদি সত্যীর মেয়ে সত্যী
হই, আর এ শয্যা থেকে উঠব না !

আমি শয্যা গ্রহণ করলুম, ছল ক'রে নয়,
সত্য। ঢেউ লেগে হঠাৎ যেমন নদীর
কূল ভেঙে পড়ে, -আমার শরীরও তেমনি
ভেঙে পড়ল। দেখতে-নেখতে মাটি যেমন
জলে মিলিয়ে যায়, আমার জীবনও তেমনি
মৃত্যু-সাগরে মিশাতে লাগল !

দাদা কবিরাজ ডাকলে। সে এসে
নাড়ী টিপলে, বড়ি দিলে, কিন্তু ঘাড় নাড়তে-
নাড়তে চ'লে গেল। আমি বুঝলুম, আমার
যন্ত্রণা শেষ হ'য়ে এসেছে।

দাদা জোর ক'রে কিছুদিন সে বড়ি
আমায় খাওয়ালে। কিন্তু আমি জানি-যে,
তা'তে কোন ফল হবে না ! এতদিন পরে
মাকে আমি স্বপ্নে দেখেছি। মা বলেছেন,

বিধবার কাহিনী

সব সতীকেই আগুনে পুড়তে হয়। কেউ ধূ-ধূ ক'রে জলে যায়, কেউ গুমে-গুমে পোড়ে।
তোমার চিতা নেব্বার সময় হয়েছে।

যদি তিনি ফিরে এসে থাকেন, হায়,
আমি কি এমনি ক'রে ফিরে আসতে বলে-
ছিলুম! এমনি স্বপ্নের মত, ধোঁয়ার মত,
রহস্যের মত, কুহকের মত!—কেবল চেয়ে-
চেয়ে দেখে, ধরতে-ছুঁতে পাব না।

একদিন দাদা আমায় ওষুধ খাওয়াতে
এলে, বললুম, 'দাদা, ওষুধ ত এতদিন খেলুম,
কোন ফল ত হ'ল না।' সে চোখ মুছতে
লাগল। তারপর জিজ্ঞাসা করলুম, 'দাদা,
সন্ন্যাসী কি চ'লে গেছেন?—না? হাঁ দাদা,
সন্ন্যাসীদের কারুর-কারুর কাছে অনেক রকম
মহৌষধ থাকে না?'

দাদা অমনি বিছানা থেকে লাফিয়ে

সীমন্তিনী

উঠল ; বললে, 'আমি কী বান্দর ! এ সোজা
কথাটা এতদিন মনে করিনি । আমি এখনই
তাকে ডেকে আনি ।'

'আজ নয়, দাদা, আজ নয় ! আমি
যখন বলব, তখন ।'

সন্ন্যাসীর কাহিনী

শকুন্তলা-লালিত হরিণ-শিশুর মত, বোধ
করি, আমি আজন্ম আশ্রম-পালিত । আমার
মাতা, পিতা, ভাই, ভগ্নী, কাহাকেও মনে
পড়ে না, কেবল মনে পড়ে, একখানি বিষণ্ণ মুখ
ও দুইটা কাতর চক্ষু । সে-মুখ আমি দিবসে
ধ্যান করি, নিশাতে স্বপ্নে দেখি ।

কে তুমি গো কল্পলোক-বাসিনী, মানস-
মোহিনী ! কোন্ তপলোক হ'তে এনে
উন্নাসীর হৃদয় আবিষ্ট করেছ ? কোন্ স্বপ্ন-
রাজ্য হ'তে এসে আমার মোহের মত আচ্ছন্ন
করেছ ? কে তুমি ? কোথায় তোমায়
দেখেছি ?

সীমন্তিনী

জেনেছি, মাতা-পিতা নির্ধম হ'য়ে আমায়
নদীনাঁরে বিসর্জন দিয়াছিলেন। ছয়-
মাসের শিশুকে সহস্র-কবল তরঙ্গ গ্রাস কর্তে
উদ্যত হয়েছিল, এক সাধু আমায় তা'র লুক
গ্রাস হ'তে কেড়ে নিয়ে গিয়ে লালন-পালন
করেন। সংসারের কোন স্মৃতি ত আমার
নাই। তুমি তবে স্মৃতির কোন্ দেশ থেকে
এসে আমায় মুগ্ধ করেছ? তোমার ঐ মুখ
দেখে কেন সন্ন্যাসীর হৃদয়ে লালসার সহস্র-
শিখা জ্বলে উঠে? মনের মধ্যে যেন বসন্ত-
রাগিনী ঝঙ্কার দেয়! সে কি তোমার
আহ্বান-ধ্বনি?

যিনি আমায় লালন-পালন করেছেন,
তিনি একজন অলৌকিকসাধনশক্তিসম্পন্ন
মহাপুরুষ। যেদিন তিনি আমায় ব্রহ্মচর্যে
দীক্ষিত করেন, সেদিন বলেছিলেন যে, নারী-

সন্ন্যাসীর কাহিনী

চিন্তা সৰ্ব্বথা পরিত্যজ্য। আমি সে মুখখানি
মন হ'তে দূর করিতে যতই যত্ন করিতে
লাগিলাম, ততই তাহা আমায় আচ্ছন্ন করিতে
লাগিল। অবশেষে একদিন সাধুকে সে
কথা বলিলাম। তিনি বলিলেন, 'আমি
তোমায় একটা প্রক্রিয়া বলিয়া দিব, তাহা
সাধন করিলে তুমি জীনিতে পারিবে, এই
রমণীমুখ তোমার পূৰ্বজন্মের স্মৃতি, কি এ-
জন্মেই তোমার শৈশবে কেহ তোমাকে আচ্ছন্ন
করিয়াছে।'

'পূৰ্বজন্মের স্মৃতি ?'

সন্ন্যাসী বলিলেন, 'আশ্চর্য্য কি ? জীবন-
নাট্যের উপর মৃত্যুর ষবনিকাপাত হইলে,
সমস্তই শেষ হয় না। সংস্কার যেমন থাকে,
স্মৃতিও তেমনি থাকে। পাশ্চাত্য জড়বিজ্ঞান
এখনও এ তত্ত্ব আয়ত্ত করিতে পারে নাই।

সীমন্তিনী

কালে জানিবে যে, দেহনাশের পর পূর্বজন্ম-স্মৃতি স্পষ্ট থাকে মাত্র, লুপ্ত হয় না। কেবল তাহাই নয়। অস্তর্জগতের কথা ত স্বভ্রম, জড়-জগতে কখন-কখন দেখা যায়, একই আকৃতি পুনঃপুনঃ প্রকটিত হয়। আমি এক মৃতবৎসা জননীর কথা জানি, বারংবার একই চেহারার মৃতশিশু প্রসব করিতেন। তিন-চারিবার প্রসবের পর, শিশুর একটা অঙ্গচ্ছেদ ক'রে দেওয়া হয়। পর-বার সেইরূপ বিকলাঙ্গ শিশুই প্রসূত হয়েছিল। ইচ্ছাময়ী প্রকৃতির অনন্ত শক্তি, অচিন্ত্য লীলা !

আমি সে অদ্ভুত সাধনায় ব্রতী হইলাম।

দীর্ঘকাল আশা-নিরাশার মধ্যে যুদ্ধ করিয়া ক্রমে ঘোর কাটিল। তারপর অঙ্কুরারে উদারাগ দেখা দিল। অবশেষে স্পষ্ট দিবা-লোকে আমি চিনিলাম, সে বিষণ্ণ মুখ আমার

সন্ন্যাসীর কাহিনী

পূর্বজন্মের স্ত্রীর। উঃ, কি নিদারুণ ঘটনা !
কলঙ্কিনী বলিয়া তাহাকে ত্যাগ করি। তারপর
সিপাহী-বিদ্রোহে ফতেপুরে প্রাণবিসর্জন দি।
মৃত্যুকালে তা'র বিষন্ন মুখ ধ্যান করিতে-করিতে
ভগবানের কাছে প্রার্থনা করিয়াছিলাম, যেন
ফিরিয়া আসিয়া স্ত্রীকে দেখিতে পাই এবং সে
আমাকে চিনিতে পারিয়া ক্ষমা করে।

পূর্বজন্মের জ্ঞানলাভ করিয়া আমি নিশ্চিন্ত
থাকিতে পারিলাম না। কি-এক অদ্ভুত
আকর্ষণ আমাকে টানিতে লাগিল।

তিনিয়াছি, মাহুষ প্রেতত্ব প্রাপ্ত হইলে
পূর্ব-কর্মভূমির উপর তাহার প্রবল আকর্ষণ
হয়। বিশেষতঃ যেখানে সে জীবনবিসর্জন
করিয়াছিল, সে-স্থান তাহাকে মোহাবিষ্টের
ন্যায় আকর্ষণ করে। আমি জীবন্ত 'প্রেতের'
মত ফতেপুরে চলিলাম।

সীমন্তিনী

সেখানে পৌছিয়া দেখিলাম, যে-স্থান
একদিন নররক্তে প্রাবিত হইয়াছিল, সেখানে
এখন একখানি রমণীয় উদ্যান-ভবন শোভা
পাইতেছে। যেখানে আমার সংকার হইয়া-
ছিল, সেখানে একটা কাঁটা-ঝাউগাছ সরল,
সতেজ ভাবে উঠিয়াছে। হায়, আমার পূর্ব-
জীবনের এই পরিণাম! একটাও ফুল নাই,
ফল নাই, কেবল কণ্টক!

আমি গভীর চিন্তায় নিমগ্ন, সহসা উদ্যান-
বাটীর ভিতরে ঘেন আমার গত জীবনটাকে
শ্লেষ করিয়া একটা কলহাস্ত উঠিল। আমি
চমকিয়া উঠিলাম। মৃত্যুর রক্তভূমে এই আনন্দের
হাট! মানুষ এমনি আত্মবিশ্বাস! মাথার
উপর শূন্য, পদতলে শ্মশান, মাঝখানে তা'র
স্বপ্নের বাসর, সহচর শমন! আমিও এই
শ্মশানে একদিন খেলাঘর বাধিয়াছিলাম।

সন্ন্যাসীর কাহিনী

যে আমার ক্রীড়ার সঙ্গিনী ছিল, যার সেই
বিষণ্ন মুখ মৃত্যুঞ্জয় হইয়া এখনও আমার মনে
জাগিয়া আছে, সে এখন কোথা? জীবিত কি
মৃত? হয় ত এখনও সে সেই খেলাঘর আগু-
লাইয়া বসিয়া আছে! কোথায় সে? কোথায় সে?
ক্রমে আমার পূর্বজন্মস্থলে আসিয়া পৌঁছিলাম।

সেখানেও কী পরিবর্তন! যাহাদের
মায়ের কোলে দেখিয়া গিয়াছি, তাহারা
এখন ছেলে কোলে লইয়া দাঁড়াইয়া আছে।
যাহাদের ঘনকৃষ্ণ কেশ ছিল, তাহাদের
কাহারও মাথায় টাক, কাহারও মাথায়
তুধের মত পাকাচুল। যেখানে মাঠ ছিল,
সেখানে হাট বসিয়াছে। যেখানে স্মৃতিরত্নের
টোল ছিল, সেখানে একখানি চটির দোকান
হইয়াছে! দেখিতে-দেখিতে আমাদের বাটীর
সম্মুখে উপস্থিত হইলাম।

সীমন্তিনী

সদর-দরজাতেই আমার সেই চোর-
সম্বন্ধীর সঙ্গে সাক্ষাৎ । বোধ হয়, আমার আকৃ-
তিতে সে আমার পূর্ব-চেহারার কিছু বিশেষ
সাদৃশ্য দেখিযাছিল, তাই হতবুদ্ধির মত ফ্যাল-
ফ্যাল করিয়া আমাকে দেখিতে লাগিল । আমি
জিজ্ঞাসা করিলাম, ‘মশায়, এখানে কিছুক্ষণ
বিশ্রাম করতে পারি কি ?’

আমার স্বর শুনিয়া সে বসিয়া পড়িল ।

আমি বলিলাম, ‘আপনি ব’সে পড়লেন
যে ? বোধ করি, খুব অসঙ্গত প্রার্থনা
করেছি ?’

সে তাড়াতাড়ি বলিল, ‘না, না, কিছু
অসঙ্গত নয় । আমার ভগ্নীর অতিথ-শালা
আছে । কিছুক্ষণ কেন, যতদিন ইচ্ছা থাকতে
পারেন ।’

সে জীবিত কি না জানিবার এই ত

সন্ন্যাসীর কাহিনী

স্বযোগ। বলিলাম, 'তবে অনুগ্রহ ক'রে আপনি তাঁর অনুমতি নিয়ে আসুন। সুবিধা পেলে এখানে কিছুদিন থাকবার প্রার্থনা করি।'

সন্ন্যাসী বলিল, 'তা'র আর অনুমতি নিতে হবে না। আমিই এখানকার কর্তা। যতদিন ইচ্ছা থাকতে পারেন।'

সে। এখনও ইহলোকে আছে শুনিয়া মন ভারি প্রফুল্ল হইল। সন্ন্যাসীর সঙ্গে একটু হাসি-তামাসা আরম্ভ করিয়া বলিলাম, 'তবে, মশায়, গোড়ায় অত ভীব্ছিলেন কি?'

'সে-কথা ভাবিনি। ভাব্ছিলুম, আপনার ত এই বিশ বাইশ বছর বয়স, এই কাঁচা-বয়েসে আপনি গেরুয়া নিয়েছেন কি দুঃখে?'

আমি বলিলাম, 'একটা-কিছু নিয়ে ত থাকতে হবে? আপনি অতিথ-শালা নিয়ে আছেন—তাই, নইলে, হয় দেশহিতৈষী হ'তে

সৌমস্বিনী

হ'ত, আর নয়, কেবল নিঃস্বার্থ পরোপকার
ক'রে বেড়াতেন।'

দেশ-হিতৈষিতা, নিঃস্বার্থ পরোপ-
কারের কথা বলিয়া সে-ই আশায় ফতেপুরে
ঠাট্টা করিয়াছিল। একে পূর্বজীবনের সঙ্গে
আমার আকৃতির সাদৃশ্য, ত'ার উপর আবার
কথাগুলোও সেই। 'স্বস্তী আবার ধপ-
করিয়া বসিয়া পড়িল।

আমি প্রশ্ন করিলাম, 'মশায়, আপনি
থাকছেন-থাকছেন, অর্মন ক'রে ব'সে-ব'সে
পড়ছেন কেন? ঘূর্ণী-রোগ আছে নাকি?'

স্বস্তী হাঁ-না কিছুই না-বলিয়া, বিস্ময়ে
আমার মুখ-চাহিয়া প্রশ্ন করিল, 'আপনি
এখন কোথা থেকে আসছেন?'

'আপাততঃ ফতেপুর থেকে।' ও কি
মশায়, এবার যে একেবারে জমী-নোবার

সন্ন্যাসীর কাহিনী

যোগাড় ! কাঁচা-বয়সে গেক্কা নেওয়া না-হয়
অপরাধ, বাইশ-বছরে ফতেপুর থেকে আসাও
অপরাধ হ'ল না কি ? বলেন ত না-হয়
ফিরে যাই ।’

সে সে-কথারও কোন উত্তর দিল না ।
আমার হাত ধরিয়া অতিথি-শালার দিকে লইয়া
যাইতে-যাইতে বলিল, ‘আপনার নাম কি ?’

হাত ধরিবার অভিপ্রায় আমি বুঝিলাম ।
তাহার দেখা উদ্দেশ্য, আমার দেহটা শুধু হাও-
য়ার—না পাঞ্চভৌতিক । আমি উত্তর দিলাম,
‘সন্ন্যাসীর নাম নাই, তবে যদি নেহাৎ আপ-
নার দরকার হয়, আমায় ভূতানন্দ ব'লে
ডাকতে পারেন ।’

নামটা শুনিয়া মম্বকী সহসা শিহরিয়া
উঠিল ! তা'র পা যেন আর চলিতে চায়
না ! বোধ হয় ভাবিয়াছিল, আমার সঙ্গে

সীমন্তিনী

নিরিবিলাি আলাপ নিরাপদ নহে। সে-কথা বুঝিয়াও না-বুঝিবার মত ভান করিয়া আমি বলিলাম, ‘যশাই মনে করেছেন বুঝি এই বয়সে সম্মানী হয়েছি গাঁজা-গুলির প্রলোভনে? তাই অমন কটমট ক’রে চেয়ে আমার ভাব বুঝছেন? ভাবছেন, গাঁজা-গুলির চেষ্টায় এখানে এয়েছি? ভয় নেই, আমার সে-সব বালাই কিছু নেই। তবে ফতেপুরে একবার গুলি খেয়েছিলুম বটে—তা সে একেবারে সাংঘাতিক রকমের!’

আমার কথা শুনিয়া তা’র মুখ একেবারে ছাই হইয়া গেল। অনেকক্ষণ নীরব থাকিয়া শেষে বলিল, ‘তাই ত!’ তারপর আপন-মনে বিড়বিড় করিতে লাগিল, ‘কখন না! হতেই পারে না! আমি আপন-হাতে—’

সম্বন্ধীর কথা শেষ না-হইতেই আমিও

সন্ন্যাসীর কাহিনী

আপন-মনে বিড়-বিড় করিয়া বলিতে লাগিলাম, 'সংসারের নিষমই এই, কখন অগ্নি-সংকার, কখন অতিথি-সংকার।'

সন্ন্যাসী হঠাৎ প্রশ্ন করিল, 'আপনি ভূত মানেন ?'

'বিলক্ষণ ! ভূত মানি না ? ভূত না-হ'লে এলুম্ কি ক'রে ?'

ভয়ে শিহরিয়া, চক্ষু বিক্ষারিত করিয়া সে বলিল, 'রাম-রাম ! আমি কি সেই কথা বলছি ?'

বুঝিলাম, রাম-নাম শুনিলে ভূত পলায়, সন্ন্যাসী তাই ছলে-কৌশলে রাম-নাম করিতেছে। এ ভূত ত পলাইবার নয় ! ভূত বলিল, 'রাম-রাম ! আমিও ত তা-ই বলছি। পাঁচভূত নিয়ে এসেছি, পাঁচভূত নিয়ে রয়েছি।'

সন্ধ্যার পর তাহার সহিত গল্প করিতে-

সীমন্তিনী

করিতে জানিলাম, এ সংসারে তিনটি বৃহৎ পরিবর্তন হইয়াছে। আমি মরিয়াছি; আমার মাতৃস্বরূপিণী মাসীয়ার লোকান্তর হইয়াছে; আর আমার স্ত্রী তাঁহার সমস্ত বিষয়-সম্পত্তি দেব-সেবা ও অতিথি সেবায় দান করিয়াছেন। ভালই হইয়াছে।

এখন ষাহাকে দেখিতে আসিয়াছি, তাহার দেখা পাই কিরূপে? যে অন্তঃপুর-রাজ্য আমি স্বৈচ্ছায় পরিত্যাগ করিয়া গিয়াছি, সেখানে ত ইহাদের অনুমতি ব্যতীত আমার প্রবেশাধিকার নাই! কোথায় তাহাকে পাইব?

ক্রমে রাত্রি হইল। আমার আহাৰাদি শেষ হইলে সম্বন্ধী শয়ন করিতে গেলেন। ক্রমে অতিথি-শালা নিশ্চুক হইল। আমি গ্রামখানি পরিদর্শন করিবার মানসে বাহির হইলাম।

সন্ন্যাসীর কাহিনী

অগ্রে আমার সেই অন্তঃপুরের উদ্যান-
খানি দেখিবার সাধ হইল। এতরাত্রে বোধ
হয়, সেখানে কেহ নাই। আন্তে-আন্তে
উদ্যানে প্রবেশ করিলাম।

বাগানের বৃক্ষসকল আমাকে পরিচিত
বন্ধুর মত আদরে আশ্বাস করিয়া লইল।
রাত্রি বিম্বিম্বি করিতেছে। আকাশে অগণ্য
নক্ষত্র উঠিয়াছে। গাছে গাছে অসংখ্য ফুল
ফুটিয়াছে। কি সুন্দর! এ-সৌন্দর্য্য কত-
বার দেখিয়াছি। যে-চক্ষুতে দেখিয়াছি, সে-
চক্ষু এখন নাই। নূতন চক্ষু পাইয়াছি। সেই
নূতন চক্ষুতে দেখিতেছি,—কি সুন্দর! আমি
বিভোর হৃদয়ে, উচ্ছ্বসিত কণ্ঠে গাইলাম—
'জনম্-জনম্ হাম্ রূপ নেহারিহু, নয়ন না
তিরপিত ভেল!'

যে-বেদীতে বসিয়া, আমার স্ত্রীর মুখ-

সীমন্তিনী

পানে চাহিয়া এই গীতটী গাহিতাম, অজ্ঞাত-
সারে আমার পদ সেই দিক চলিল। কিছু-
দূর অগ্রসর হইয়াই দেখিলাম, বেদীর উপরে
—সে-ই!—নিতর যামিনীর নীরব, নিথর
প্রতিমূর্তির মত একাকিনী বসিয়া আছে।
ইচ্ছা হইল, ছুটিয়া গিয়া বলি, ওগো, তুমি
যার প্রতীকায় বসিয়া আছ, আমি সে-ই।
ইচ্ছা হইল, এই দেবীর সম্মুখে জামু পাতিয়া
বলি, ওগো, আমি এসেছি, এসেছি, জীবনের
পারে মৃত্যুর দেশ থেকে নবজীবন নিয়ে
তোমার ক্রমা ভিক্ষা করতে এসেছি।

সে আমায় দেখিল। ভয়-জড়িত কণ্ঠে
প্রশ্ন করিল, 'আপনি কে?'

'আমি সন্ন্যাসী। তুমি কে? এ ঘোর
রাত্রিতে একাকিনী ফুলবনে? তুমি স্বর্গের
ইন্দ্রাণী, না, মর্ত্যের ফুলরাণী?'

সন্ন্যাসীর কাহিনী

সে-জীবনে ইহাই তাহাকে আমার প্রথম-
সম্ভাষণ। এ জীবনেও তা-ই। আজিও যে
আবার আমাদের প্রথম-মিলন। কিন্তু আমার
প্রশ্নে সে যেন কেমন অভিভূত হইয়া পড়িল!
ইচ্ছা হইল, ছুটিয়া গিয়া বক্ষে তুলিয়া লই।
তখনই মনে হইল, আমি যে সন্ন্যাসী। এ
সুখা আমার জন্ম নয়। আমি ব্রহ্মচারী আর
এ-ও যে ব্রহ্মচারিণী। আমার স্ত্রী যে বিধবা!
আমাদের মাঝে যে মৃত্যুর নিষ্ঠুর ব্যবধান!
এই মৃত্যু-নদীর দুই কূলে দু'জনে দাঁড়াইয়া,
পরস্পরকে কেবল দেখিব! এ চক্রবাক্-
মিথুনের বিচ্ছেদ-যামিনী পোহাবে না,
পোহাবে না, আর পোহাবে না! হায়,
সাধনার পূর্বস্বতি জাগাইয়াছি কি এই জন্ম?
যত্ন ক'রে গরল কিনেছি, তপস্যার বরের
পরিবর্তে অভিসম্পাত ঝাঙ্কা করেছি! ধিক!

সীমন্তিনী

বিধাতা মঙ্গলময়, করুণাধার—তাই মহানিদ্রার
অন্তে নব-জাগরণে আর পূর্বস্মৃতির উদ্বোধন
হয় না ! ছুটিয়া অতিথ-শালায় চলিয়া গেলাম ।

হায়, আমার স্ত্রী এখন পরের কুলবধু !
নিত্য সে অতিথ-শালায় আসে । নিত্য
সেই বিষন্ন মুখ, নৈরাশ্র-কাতর নয়ন দেখিতে
পাই । নিত্য তা'র নয়ন নীরবে আমাকে
কত প্রশ্ন করে । সে কাতর চক্ষুর অন্তরালে
কি প্রেম, কি পিপাসা ! কি নিদাক্রণ, করুণ
কাহিনী লিখিত ! এই নীরব-শোক-পরায়ণা
নারী—ইহার মর্ম্ম-কথার শ্রোতা নাই, ব্যথার
ব্যথী নাই—এই জনপূর্ব পুরীতে আপনার
মুক দুঃখভার লইয়া একাকিনী বসিয়া আছে !
হায়, কেন হেথা আসিলাম, কেন ইহাকে
দেখিলাম, কেন দেখা দিলাম ! কেবল দহিব,
দগ্ধ করিব বলিয়া ? মনে হয়, ছুটিয়া পলাই,

সন্ন্যাসীর কাহিনী

কিন্তু পারি না। 'নারীচিন্তা সৰ্ব্বথা পরি-
তাজ্য।'—হায়, গুরুদেব! আজন্ম সন্ন্যাসী—
তুমি ত জান না, এ-চিন্তায় কত বিষ,
কত মধু!

আজ কয়দিন হইতে আর তাহাকে
দেখিতে পাই না। কেন? আমি সন্ন্যাসী,
নারী-সম্বন্ধে কোন প্রশ্ন করিবার অধিকার
আমার নাই! যে আমার জীবনের জীবন,
যার জন্য আমার জীবন-ধারণ, যার জন্য
মৃত্যুর বাহ ভেদ ক'রে এসে অসম্ভব সম্ভব
করেছি, সে কেমন আছে, এ-কথা জিজ্ঞাসা
করিবার অধিকার আমার নাই। আমার
স্ত্রী হইলেও সে যে আর আমার নয়।
আমার জীবন-ধারণে যে আমার স্ত্রীর মৃত্যু
হয়েছে। সন্ন্যাসীর নারীচিন্তা যে পাপ!

পাপ? প্রেম—কলুষ? যে-প্রেমে শব্দ

সীমন্তিনী

উদাসী, গোলোকপতি গোপিনী-পিয়াসী,
শ্রীগোরাঙ্গসুন্দর সন্ন্যাসী, সে-প্রেম—কলুষ ?
যে-প্রেমে হর-গৌরী কায়-কায় মিলিত,
বিশ্ব বলয়িত, সংসার-শৃঙ্খলিত ; যে-প্রেম
শিবের সাধনা, হরির কামনা, যোগীর
আকিঞ্চন, ব্রহ্মাণ্ডের আকর্ষণ, অষ্টধতের
তত্ত্ব, সে-প্রেম—কলুষ ? যে-প্রেমে কুৎসিত
সুন্দর, যে-প্রেম পরমানন্দের নিব্বার, সে-
প্রেম—কলুষ ? হায়, গুরুদেব ! হায়,
গুরুদেব !

আরও কয়েকদিন তাহার কোন সংবাদই
পাইলাম না। মন নিরতিশয় ব্যাকুল।
আমার সম্বন্ধী চকিতের ঞ্চায় আসে, আবার
চলিয়া যায়। তাহার ভাব দেখিয়া মনে
হয়, যেন সে কি বলিতে চায়, বলিতে পারে
না। আমিও কোন কথা জিজ্ঞাসা করিতে

সন্ন্যাসীর কাহিনী

পারি না। আগ্নেয়গিরির মত আপনার
অন্তর্দাহ লইয়া চূপ করিয়া বসিয়া থাকি,
এখানে থাকাও মুশ্বিল, যাওয়াও দায়।

এইরূপে আরও কিছুদিন গেল। তারপর
একদিন অপরাহ্নে সঙ্কী আমায় বলিল,
তা'র ভগ্নীর সাজ্বাতিক পীড়া, আমায় দেখিতে
চাহিয়াছে। সন্ন্যাসীর পুণ্য-দর্শনে যে পাপ-
ক্ষয় হয়!

সন্মান্য সভ্যতার যাহা প্রয়োজন, একজন
পথ-প্রদর্শক হইয়া লইয়া যাওয়া, আমি
তাহারও অপেক্ষা করিতে পারিলাম না।
এই কি আমার সভ্যতার সম্মান করিবার
সময়? একেবারে ছুটিয়া গিয়া আমার শয়ন-
কক্ষে প্রবেশ করিলাম—বাইশ বৎসর পরে!

কক্ষে প্রবেশ করিয়া দেখিলাম, আমাদের
সেই বাসরশয্যা সে অস্তিম-শয্যা পাতিয়াছে।

সৌমস্তুনী

আমাকে দেখিয়াই তা'র চোখে-মুখে কি-
এক দিব্যালোক ফুটিয়া উঠিল! নিকটে
আসন ছিল, আমায় বসিতে ইঙ্গিত করিল।
আমি বসিলাম। তাহার কাছে একখানি
ছবি ছিল—আমারই ছবি—নঙ্গোপনে সে
বারবার সেই ছবি ও আমাকে দেখিতে
লাগিল।

বাইশ বৎসর পূর্বে সে ঘর আমি যেরূপ
অবস্থায় রাখিয়া গিয়াছিলাম, ঠিক তেমনিই
আছে! আমার কোচান-চাদরখানি, জামাটা
তেমনি আনুলায় ঝুলিতেছে। ছড়িগাছটা
ঘরের এক কোণে আমার করম্পর্শের প্রতীক
করিতেছে। কেবল আমার চটীজোড়াটা
চন্দন-কুমুম-চর্চিত হ'য়ে একটা সজ্জিত আসন
অধিকার করিয়াছে। ঐ সেই-বালাকর্ণবরণা
জগদ্ধাত্রীর পট। নীতার অগ্নিপরীক্ষা। সাবিত্রী-

সন্ন্যাসীর কাহিনী

অঙ্কে সত্যবান্ শায়িত—প্রাণ-ভিক্ষার্থে শমন
সম্বর্পিত-পদে আগুমান । আর ঐ সেই সেতার
—হায়, চির-নীরব!—যার তারে-তারে বাজিত
—‘জনম্-জনম্ হাম রূপ নেহারিষু, নয়ন না
তিরপিত ভেল ।’ সকলই তা’ই আছে, কেবল
আমি মরিয়াছি, আর মরিতে চলিয়াছে
আমার স্বর্গের ইন্দ্রাণী, মর্তের ফুলরাণী । ঐ
সেই ছিন্ন হার—দেওয়ালে লম্বমান । ফুলের
পাপড়ী ঝরিয়া গিয়াছে, কেবল শুক বৃন্ত ও
সূত্র ঝুলিতেছে, আমাদেরই প্রণয়-হারের
মত ! দেখিয়া আমার অন্তস্তল মথিত করিয়া
একটা দীর্ঘশ্বাস উখিত হইল । সহসা বলিয়া
ফেলিলাম, ‘হায়, এ ছিন্নহার আর জোড়া
লাগবে না ।’ আমার কথা শুনিয়াই শয্যা-
শায়িনী চমকিত হইয়া কাতর-কুতূহল-নেত্রে
আমার পানে চাহিল । তাহার সর্বাঙ্গ

সৌমস্তুনী

কাগিতে লাগিল। অতি সামান্য উদ্বেজনাও
এখন আর তাহার সহ্য হয় না।

অনেকক্ষণ নীরব থাকিয়া সে অতি ক্ষীণ,
কাতর-কণ্ঠে, ধীরে-ধীরে বলিল, 'সন্ন্যাসি,
তোমাকে অনেক দিন থেকে একটা কথা
জিজ্ঞাসা করি-করি ক'রে করতে পারি নি।
এখন না-জিজ্ঞাসা করলে আর সময় পাব না।
আমার দিন ফুরিয়েছে। সন্ন্যাসি, তুমি কে?'

বলিবার দিন আমিও ত আর পাইব না।
যে-কথা চাহিতে আসিয়াছি, আজ না-চাহিলে
আর ত চাওয়া হইবে না। সে আমার নীরব
দেখিয়া পুনরায় বলিল, 'সন্ন্যাসি, আমি সামান্য
কৌতূহলে এ-কথা জিজ্ঞাসা করি নি। তোমার
উত্তরের উপর আমার ইহকাল-পরকাল নির্ভর
করছে। সন্ন্যাসি, তুমি কে? তুমি কি চির-
দিনই এমনি সন্ন্যাসী?'

সন্ন্যাসীর কাহিনী

কক্ষে কেহ ছিল না। তথাপি আমি চারিদিক্‌ নিরীক্ষণ করিয়া বলিলাম, 'না। একদিন আমারও এমনি গৃহ ছিল। বাপ, মা, মাসী ছিল।'

'তোমার স্ত্রী ছিল না?'—'আছে।'

'বঁচে আছে?'—'আছে।'

'তবে তুমি সন্ন্যাসী কেন?'

'আমি তা'রই জন্ম সন্ন্যাসী।'

সে অতি ব্যস্ত হইয়া জিজ্ঞাসা করিল, 'কেন, কেন?' আমি বলিলাম, 'তুমি ব্যস্ত হ'য়ো না। তোমার শরীর দুর্বল। আমি তোমা'য় সব কথা বলছি। বলতেই এসেছি। আমার স্ত্রীকে আমি কলঙ্কিনী মনে ক'রে ত্যাগ ক'রে গিয়েছিলুম।'

সে যেন আর কিছুতেই স্থির থাকিতে পারে না—উঠিতে চায়। আমি বলিলাম, 'তুমি স্থির হও, নইলে তুমি ষাবে। সব কথা

সীমন্তিনী

শোনা হবে না। একদিন আমার স্ত্রীর কাছে আমাদের বাগানে তা'র ভাই দাঁড়িয়েছিল ; আমি তা'কে দেখে ভুল বুঝেছিলুম।'

'তারপর, তারপর ? বল, বল।'

'স্থির হও, সতীর গর্ভে যার জন্ম, সেই সতীকে আমি ভুল বুঝে, অসতী মনে ক'রে বিবাগী হ'য়ে ঝাই। তারপর ফতেপুরে সিপাহী-বিদ্রোহে আমি আহত হই।'

'তারপর কি হ'ল ?'

'তারপর সেই 'মুমূষু'-অবস্থায় আমার স্ত্রীর ভা'য়ের সঙ্গে দেখা হয়। তা'র কথায় আমার সব ভুল ভেঙে গেল। আমি স্ত্রীর ছবি ধ্যান করতে-করতে ভগবানের কাছে প্রার্থনা করলুম, এ জীবনে কেবল ব্যথা দিয়ে গেলুম, ব্যথা নিয়ে গেলুম ; আবার ফিরে এসে যেন তা'কে দেখতে পাই তা'র কাছে মার্জনা

সন্ন্যাসীর কাহিনী

চাইতে পারি, তাই এসেছি। তোমার কাছে ক্ষমা চাইতে এসেছি। যে-ভুল করেছিলুম, প্রাণ দিয়ে তা'র প্রায়শ্চিত্ত করেছি। এখন কি মার্জনা করবে না? তোমার ঋণে মুক্ত না-হ'লে আমার মুক্তি নেই। কে জানে, কোন্ জন্মে, কোন্ শ্রোতে ভাসতে-ভাসতে এসে তোমার সঙ্গে মিলিত হয়েছিলুম। শ্রোতের তৃণ মেলে, আবার বিচ্ছিন্ন হ'য়ে যায়। জানি না, কবে, কোথায়, কি-ভাবে আবার তোমার সঙ্গে দেখা হবে! নিষ্ফলে একটা জীবন দিয়েছি, প্রেমতৃষ্ণা মেটেনি। এ-জীবনও বিফলে গেল!

আমার এ তৃষ্ণা নিয়ে কি জন্ম-জন্ম ফিরবে?
হায়, কোথায় সে অমৃত-সিকু, যার বিন্দুপানে
সকল তৃষ্ণার নিবৃত্তি হয়! হায় গুরুদেব,
হায় গুরুদেব!

সীমন্তিনী

‘সতি, তোমায় ত্যাগ ক’রে আমি চ’লে
গিয়েছিলুম। প্রেম—মৃত্যুঞ্জয়, সেই প্রেমে
আবার আমায় তুমি বেঁধে এনেছ! এনে
আমায় ফেলে চললে। এক জীবন তুমি
আমার চিন্তায় কাটিয়েছ, এ-জীবন আমি
তোমার প্রেম ধ্যান ক’রে কাটাব। আমি
সন্ন্যাসী, কিন্তু তোমার শিক্ষিত প্রেম আমার
ধ্যান, জ্ঞান, সার্থনা।’—বলিতে-বলিতে তাহার
শীর্ণ হাতখানি ধরিবার জন্য আমি হাত বাড়াই-
লাম। সে উত্তেজিত কণ্ঠে বলিয়া উঠিল,
‘ক্ষমা কর, ক্ষমা কর! তুমি সন্ন্যাসী, আমি
ব্রহ্মচারিণী। এ-সব কথা তোমায় বলতে
নেই, আমায় শুনতে নেই। ভগবান্ দয়াময়,
একশ বছরের যজ্ঞণা আজ আমার সার্থক হ’ল।
দেহ যায়, স্নেহ বিফল হয় না; প্রাণ যায়,
প্রেম নিষ্ফল হয় না—হারাণ-রত্ন কুড়িয়ে

সন্ন্যাসীর কাহিনী

পায়। সতীর জন্ম-জন্ম এক পতি। তিনিই
ভুলোক-দ্যালোক-গোলোকপতি। সন্ন্যাসি,
আমি চিনেছি, তুমি সে-ই! ঐ দেখ, সন্ন্যাসি,
মা এসেছেন সতীলোক থেকে আমায় নিতে।
আর ত দেরি করতে পারি নি। তোমার সঙ্গে
কথা শেষ হ'ল না। কথা ফুরবার নয়, সাধ
মেটবার নয়। আমি যাই,• তুমি এস,
এখানে তোমার প্রতীক্ষায় ছিনুম, সেখানেও
তোমার প্রতীক্ষায় থাকুব। তুমি এস।
আর বিচ্ছেদ হবে না। মা বলেছেন, আর
বিচ্ছেদ হবে না। কি আনন্দ! মুক্তি,
মুক্তি, যন্ত্রণার কারাগার থেকে আজ আমার
চিরমুক্তি! সন্ন্যাসি, তোমার একী রূপ!
মরি-মরি, তুমি এত সুন্দর! এমন রূপ ত
তোমার কখন দেখি নি! একী দিব্য-জ্যোতি
তোমার মুখে! তোমার সর্ব্বাঙ্গে কিরণ


সীমস্তিনী

ঠিকরে পড়ছে ! সন্ন্যাসি, আর আমার পায়
ঠেল না । সন্ন্যাসি—’

হায়, মুখের কথা মুখেই রহিল, শেষ হইল
না ! প্রাণশূণ্য প্রতিমা আমার পদমূলে
লুটাইয়া পড়িল !

সহসা যেন কত অজ্ঞাত কুসুম-সৌরভে
কক্ষ আমোদিত হইল ! আমি চকিত হইয়া
শুনলাম, যেন সেই ছিন্নতার সেতার এতদিন
পরে আবার বাজিতেছে ! সেই দিব্য সৌরভ,
দিব্য সঙ্গীতের সঙ্গে-সঙ্গে আমার সীমস্তিনী
সতী-লোকে চলিয়া গেল ! কেবল সেই ছিন্ন-
হার, আর সেই ছিন্ন-তার সেতার ভূতলে
পড়িয়া রহিল ! হায় গুরুদেব ! হায় গুরুদেব !

সম্পূর্ণ



আট-আনা-সংস্করণ-গ্রন্থমালা

যুরোপ প্রভৃতি মহাদেশে “ছয়-পেনি-সংস্করণ”—“সাত-পেনি-সংস্করণ” প্রভৃতি নানাবিধ সুলভ অথচ সুন্দর সংস্করণ প্রকাশিত হয়-- কিন্তু সে সকল পূর্বে প্রকাশিত অপেক্ষাকৃত অধিক মূল্যের পুস্তকাবলীর অন্ততম সংস্করণ মাত্র। বাঙ্গালাদেশে—পাঠকসংখ্যা বাড়িয়াছে, আর বাঙ্গালাদেশের লোক—ভাল জিনিষের কদর বুঝিতে শিখিয়াছে; সেই বিশ্বাসের একান্ত বশবর্তী হইয়াই, আমরা বাঙ্গালা দেশের লক্ষপ্রতিষ্ঠ কীর্তিকুশল গ্রন্থকারবর্গ-রচিত সারবান, সুখপাঠা, অথচ অপূর্বে-প্রকাশিত পুস্তকগুলি এইরূপ সুলভ সংস্করণে প্রকাশিত করিতে প্রবৃত্ত হইয়াছিলাম। আমাদের চেষ্টা যে সফল হইয়াছে, ‘অভাগী’ ও ‘পল্লী-সমাজের’ এই সামান্য কয়েক মাসের মধ্যে তৃতীয় সংস্করণ এবং ধর্মপাল, বড়বাড়ী, কাঞ্চনমালা, দুর্বাদল ও অরক্ষণীয়ার দ্বিতীয় সংস্করণ ছাপিবার প্রয়োজন হওয়াই তাহার প্রমাণ।

বাঙ্গালাদেশে—শুধু বাঙ্গালা কেন—সমগ্র ভারতবর্ষে একরূপ সুলভ সুন্দর সংস্করণের আমরাই সর্বপ্রথম প্রবর্তক। আমরা অনুরোধ করিতেছি, প্রবাসী বাঙ্গালী মাত্রেই আট-আনা-সংস্করণ গ্রন্থাবলীর নিদ্দিষ্ট গ্রাহকশ্রেণী ভুক্ত হইয়া এই ‘দিরিজের’ স্থায়িত্ব সম্পাদন ও আমাদের উৎসাহবর্ধন করুন।

কাহাকেও অগ্রিম মূল্য দিতে হইবে না; নাম রেজেষ্টারী করিয়া রাখিলেই আমরা যখন যেখানি প্রকাশিত হইবে, সেইখানি ভি, পি ডাকে প্রেরণ করিব। সর্বসাধারণের সহানুভূতির উপর নির্ভর করিয়াই আমরা এই বহুবায়সার্থ্য কার্যে হস্তক্ষেপ করিয়াছি; গ্রাহকের সংখ্যা নিদ্দিষ্ট থাকিলে আমরা দিগকে দ্বিতীয় বা তৃতীয় সংস্করণ ছাপাইয়া অধিক বায়ভার বহন করিতে হইবে না।

- ১। অভাগী (৩য় সংস্করণ)—শ্রীজলধর সেন
- ২। ধর্মপাল (২য় সংস্করণ) শ্রীরাখালদাস বন্দ্যোপাধ্যায়, এম, এ
- ৩। পল্লী-সমাজ (৩য় সংস্করণ) শ্রীশরৎচন্দ্র চট্টোপাধ্যায়
- ৪। কাঞ্চনমালা (২য় সংস্করণ) শ্রীহরপ্রসাদ শাস্ত্রী, এম, এ

- ৫। বিবাহ-বিপ্লব (২য় সংস্করণ) শ্রীকেশবচন্দ্র গুপ্ত, এম্, এ
- ৬। দুর্বাদল (২য় সংস্করণ) শ্রীধরীন্দ্রমোহন সেন গুপ্ত
- ৭। বড়বাড়ী (২য় সংস্করণ)—শ্রীজলধর সেন
- ৮। অরক্ষণীয়া (২য় সংস্করণ) শ্রীশরৎচন্দ্র চট্টোপাধ্যায়
- ৯। ময়ূখ—শ্রীরাখালদাস বন্দ্যোপাধ্যায়, এম্, এ
- ১০। সত্য ও মিথ্যা—শ্রীবিপিনচন্দ্র পাল
- ১১। রূপের বালাই—শ্রীহরিসাধন মুখোপাধ্যায়
- ১২। সোণার পদ্ম—শ্রীসরোজরঞ্জন বন্দ্যোপাধ্যায় এম্, এ
- ১৩। লাইকা—শ্রীমতী হেমনলিনী দেবী
- ১৪। আলোয়া—শ্রীমতী নিরুপমা দেবী
- ১৫। বেগম সমরু—শ্রীব্রজেন্দ্রনাথ বন্দ্যোপাধ্যায়
- ১৬। নকল পাঞ্জাবী—শ্রীউপেন্দ্রনাথ দত্ত
- ১৭। বিম্বদল—শ্রীধরীন্দ্রমোহন সেন গুপ্ত
- ১৮। হালদার বাড়ী—শ্রীমুনীন্দ্রপ্রসাদ সর্বাধিকারী
- ১৯। মধুপর্ক—শ্রীহেমেন্দ্রকুমার রায়
- ২০। লীলার স্বপ্ন—শ্রীমনোমোহন রায়, বি এ. বি এল
- ২১। স্নেহের হর—শ্রীকালীপ্রসন্ন দাসগুপ্ত, এম্, এ
- ২২। মধুমল্লী—শ্রীমতী অনুরূপা দেবী
- ২৩। রসির ডায়ারী—শ্রীমতী কাকুনমালা দেবী
- ২৪। ফুলের তোড়া—শ্রীমতী ইন্দিরা দেবী
- ২৫। ফরাসী বিপ্লবের ইতিহাস—শ্রীসুরেন্দ্রনাথ ঘোষ
- ২৬। সীমন্তিনী—শ্রীদেবেন্দ্রনাথ বসু
- ২৭। নব্য বিজ্ঞান—(যন্ত্র) শ্রীচারুচন্দ্র গুপ্তাচার্য এম্, এ

গুরুদাস চট্টোপাধ্যায় এণ্ড সন্স,
২০১, কর্ণওয়ালিস স্ট্রীট, কলিকাতা।

শ্রীযুক্ত চন্দ্রশেখর মুখোপাধ্যায়-লিখিত

ভূমিকা-সংবলিত গল্পপুস্তক

বাসি ফুল

শ্রীদেবেন্দ্রনাথ বসু প্রণীত ।

ছাপা ও কাগজ উৎকৃষ্ট । তিন রঙের
চিত্রযুক্ত সুন্দর সিল্কের বাঁধাই, উপহার দিবার
পক্ষে অধিতীয় পুস্তক । •

মূল্য ১।০ টাকা

অভিষত ।

সাহিত্যাচার্য অক্ষয়চন্দ্র—দেবেন্দ্র-
বাবু এইরূপ লেখা লিখিয়া ধন্য হইয়াছেন ।

সমাজপতি—যে অনুভূতির ছায়া
লোকসম্পাতে ক্ষুদ্রপটে ছবিগুলি ফুটাইয়া
তুলিয়াছেন, বাঙ্গালা সাহিত্যে সে অনুভূতি
বড় বিরল ।

পাঁচকড়ি বন্দ্যোপাধ্যায়—ইহার
পরতে পরতে হিন্দুত্বের ভাব জমাট আছে ।

বিপিনচন্দ্র পাল—চরিত্রগুলি অধি-
কাংশই সজীব ও বস্তুতন্ত্র ।

সার্ব গুরুদাস—এই পুস্তকখানি বঙ্গ-
সাহিত্যে একটি উচ্চস্থান পাইবার যোগ্য ।

Sir A. T. Mukherjee—The au-
thor is evidently a gifted writer.

Sir A. Chowdhury—I have no-
thing but praise for it.

Amrita Bazar—The stories are
replete with dramatic situations.

Bengalee—The stories abound in
pathos of a rare order.
